

(2)

D E  
**EXISTENTIA DEI**  
*DISSERTATIO*

AUCTORE  
**ISIDORO PLANCO**

ORD. S. BENEDICTI CONGR. CAMALD.



**PANORMI MDCCLXXII.**

Excudebat Cajetanus Maria Bentivenga.

\*\*\*\*\*  
*POTESTATIBUS ANNVENTIBUS.*

10

THE UNIVERSITY OF CHICAGO

CHICAGO, ILL.

1911

1911

1911

( III )

# FRANCISCO. TESTÆ

ARCH . AB . ET . DOM . MONREG

FERDINANDI . REGIS . A . CONSILIO

XIIVIRO . REGNI . SICILIÆ

OB . SINGVLAREM . EIVS

IN . BONAS . ARTES . AMOREM

ET . EFFVSAM . IN . LITTERAS . LIBERALITATEM

IOSEPH . MARIA . BENTIVENGA

IN . SEMINAR . MONREGALEM . CONVICTOR

ET . IN . ARCHIEPISCOP . ACADEMIA

PHILOSOPHIÆ . ET . MATHESIOS . AVDITOR

LIBELLVM . HVNC

IN . QVO . DE . EXISTENTIA . DEI . DISPVTATVR

PRÆSVLI . BENEFICENTISSIMO

PATRI . OPTIMO . ET . INCOMPARABILI

DEVOTVS . NOMINI . MAIESTATIQUE . EIVS

D . D

LIBENS . MERITO

THE  
JOURNAL  
OF  
THE  
ROYAL  
ANTHROPOLOGICAL INSTITUTE  
VOLUME 10  
PART 1  
1880  
LONDON  
PUBLISHED BY THE  
EDUCATIONAL SOCIETY  
10, BEDFORD SQUARE, W.C.

( V )

# LECTORI

Φ Ι Λ Ο Σ Ο Φ Ω .

## ISIDORUS PLANCUS

ORD. S. BENEDICTI CONGR. CAMALDUL.

In Archiepiscop. Academia Monregal.  
Metaphysices ac Geometriæ  
Antecessor.



*Agno equidem totius Philosophia  
boro, atque incremento, quod  
minime ignoras, Lector Opti-  
me, superiore ætate contigit, ut,  
reviviscente Sapientia studio,  
ac multo post tempore remigran-  
te, excellentior, ac sapientior  
in Italicis Academiis philoso-  
phandi ratio instituta sit, ut  
eam agris iis comparare facile  
possimus, qui intermissâ culturâ feraciores fieri so-  
lent, & lectiorem deinde uberiolemque segetem prose-  
runt. Inborruerat profecto barbarie disciplina hac om-  
nium pulcherrima, & traducta per manus imperito-  
rum ita squalibat, ut ipso suo fœditatis aspectu per-  
spicaciora etiam ingenia ab se omnino repelleret. Sed*

b

po.

posteaquam sapientes atque ingenii magnitudine præstantes viri Geometricas doctrinas ad Philosophiam felici satis omine transtulerunt, ita hæc paulatim caput extulit, squalorem abiecit, incrementum sumpsit, ut jam pristinam dignitatem, majestatemque teneatur. Me scire non latet fore nonnullos e Peripateticorum grege, qui nos reprehendent, quod eam & nos Philosophiam excolamus, quæ Mathematicis jungitur principiis & doctrinis. At eorum imperitia, ac præjudiciis obistere vehementer debemus. Quis enim in ea Philosophiæ luce, in qua Dei immortalis munere versamur, turpiter ignorat nugis ac puerilibus questionibus refertam esse eam Philosophiam, quæ nihil Geometrici admixtum habeat? Quis non fatetur a recta philosophandi ratione longissimo eos distare intervallo, qui a Geometricis doctrinis abhorreant? Exploratum scilicet nobis satis jam est ad scientias omnes rectè perdiscendas ita necessarium esse Geometriæ studium, ut eo sublato, vel neglecto, omnis sit quoque pulcherrimarum artium disciplinis sublatus decor, omnis sublata jucunditas. Verum, ut reliquas scientias silentio præteream, quæ Geometriâ tanquam firma basi innituntur, sermonem tantummodo instituiam de iis, quæ Ecclesiastico præsertim viro dignissima sunt, Philosophia scilicet & Theologia. Quis non ultrò dedit sapientis, ac Philosophi nomen immerito sibi eum prorsus vindicare, atque inævem Philosophiæ umbram & simulacrum sequi, qui Geometriæ principia cum Philosophicis non conjunxerit, atque consociarit? Neque enim vel Gassendi, vel Cartesii, vel immortalis Galilæi, vel divini Newtoni, vel aliorum excellentium Philosophorum, quos hæc nostra talis ætas, præclaros haberemus libros, ex quibus uberrimi colliguntur fru-

fructus, si Matthesi multam salutem Ipsi dixissent, nec veteri excusso jugo, bellum hypobesibus, atque ineptiis, quibus Peripateticorum libri referti sunt, strenuè intulissent.

Porro Logicam inter & Geometriam tam arcta est necessitudo, ut nobilissima disciplina etsi verbis discrepare, re tamen concinere videantur. Et sanè Dialectica, cujus ope tantummodo facilius inveniri potest id, quod aut verum est, aut ad veritatem proxime accedit, quid aliud est tandem, quam præstantior quædam & utilior mentis Geometria, sine qua in summo errore necesse est homines, atque in maximarum rerum ignoratione versari? Cum enim judiciorum nostrorum errores ex principiis tamquam ex fontibus, non vero ex illationibus proficiantur, patet principia, quibus vera & falsa judicentur, nulla alia esse posse quam Geometrica, ea nimirum quæ certâ viâ & ratione cogitationes nostras ita disponant, ut vel inviti, quid verum sit, inveniamus. Quid est autem tam temerarium (inquit Tullius lib. 1. de Nat. Deor.), tamque indignum sapientis gravitate atque constantia, quam aut falsum sentire, aut quod non satis explore perceptum sit & cognitum sine ulla dubitatione velle defendere? Atqui Dialectici, quibus vel ipsum Geometriæ nomen fuit invisum, in tam varias & absurdas abjecerunt opiniones, tot sermonum ut ita dicam monstra intulerunt, ut suspicari jure possit an se ipsos intelligerent. Non ita Majores nostri, & Eleatenses præcipuè Philosophi Democritus & Zeno, qui omnium primi, teste Clemente Alexandrino (Lib. 1. Strom.), Logices præcepta literarum monumentis mandarunt. In eorum enim Schola cum Geometrica ita exculta fuerint studia, ut Geometricarum

*demonstrationum artem suo sibi veluti jure vindicarent, dubitari vix potest, quin eisdem Analyticae methodi, qua nihil validius ad veri inquisitionem esse potest, & Syntheticae, qua nihil ad docendum utilius, praecepta debeamus.*

*Ad Metaphysicam quod spectat, cum ipsa primum de universalioribus humanae cognitionis principiis rationis ope inquirat, cum de animorum natura, de societate mentem inter & corpus, de spiritibus omnibus, de Deo, de Revelatis tractationem eadem via instituat, cumque tot & tantarum verum investigationes non a sensibus, sed a ratiocinatione, quae perfecta sit, pendeant, perspicuum fit neminem, qui Mathematicos elementa nondum degustaverit, Metaphysici nomen sibi assumere posse. Et revera si conseras inter se, quae Mathematici Geometriae ignari de Ontologicis principiis, de Deo, de Mundo, de Spiritibus excogitarunt, cum iis, quae tradiderunt Philosophi Geometrico pulvere imbuti, tanto haec iis praestare agnosces quanto tenebris lucem. Est enim & Philosophi, & Theologi de Deo Optimo Maximo, de animorum immortalitate habere non errantem & vagam, ut sapientes Ethnici, sed ut Nostri stabilem, certamque sententiam. Praclare Boetius (Arithmet. lib. 1. cap. 1.): Quod haec qui spernit, idest has semitas sapientiae (Geometriam nempe & Arithmeticam), ei denuncio non recte philosophandum. Et paulo infra: Constat igitur, quisquis haec pratermiserit, omnem Philosophiae perdidisse doctrinam. Et Clemens Alexandrinus (eod. lib. 1. Strom.) docet in his disciplinis, Geometria & Arithmetica, purgari a sensibilibus rebus animam, & renovari; quo veritatem contemplari queat. Ipsius verba haec sunt: Εἰς αὐτοῦ τῶν τοῖς μαθηματικῶν ἐκκαθαρισμῶν αὐτῆς*



ἀσθενὲς ἔκαστος αὐτοῦ ἢ ψυχὴ ἴα δι' αὐτὴν ἀλάττω  
 ἵκναι δυνάμει. Il vero quis prudens verum iudex au-  
 deat negare? Atque ego in hac re plura sciens, prae-  
 termitto; quis enim omnia persequatur?

Si vero sermo sit de rebus Physicis & Geometri-  
 cis, ipsae & inter se eo copulantur vinculo, ut sine ha-  
 rum adjumento, nihil ferè de aliis statuere possis.  
 Nemo nostra hac aetate profecto ignorat rerum caus-  
 sas omnes, atque effectus ex variis atque innumeris  
 motus legibus ita pendere, ut eo sublato omnem pror-  
 sus elanguescere naturae vim oporteat. A motu pen-  
 dent dierum, nocturnaeque vicissitudines, frigoris & co-  
 loris, nivis & pluviae se se mutuo excipientium va-  
 rietas tanta, atque anni tempestates omnes; per mo-  
 tum parit terra plantas, pubescunt & nutriuntur ar-  
 bores, vivunt denique animalia omnia, cum vitam  
 ipsam nonnisi in motu sanguinis, nimirum in circu-  
 latione sitam esse intelligamus. Hinc celebre illud  
 Aristotelis effatum: Ignorato motu, naturam quoque  
 ignorari necesse est. At motus leges ita Geometricis  
 junguntur, ut ab ipsis disjungi, ac divelli nequeant.  
 Ne autem in recitandis exemplis multus fiat, satis  
 erit pauca ex multis delibare. Notum satis est in  
 corporibus, quae motum per curvam lineam absolvunt,  
 duplicem inesse vim, alteram quam appellant Centri-  
 petam, aliam vero quam Centrifugam vocant. Quis  
 vero huius motus leges explicare se rectè admodum  
 posse putabit, si Geometriae omnino rudis atque expertus  
 fuerit? Compertum quoque est motum, qui ex accelerato,  
 & aequabili componatur, absolvi per curvam parabolici-  
 cam. Qui vero fieri poterit, ut huiusce motus canones  
 satis intelligas, si proprietates atque affectiones lineae  
 parabolicae ignoraveris? Theoriam pendulorum vel per

arcus circulares, vel per arcus cycloides excurrentium, sex artis ballistica problemata, aquarum fluentium cursum, adscensus liquorum in tubos leges, quomodo quæso percipies Geometriæ expertus? Cum rationis duplicata, rationis reciproca, rationis compositæ nomina audieris, cum denique tot alia acceperis, quæ profectio ex Geometria duci debent, ut rectè Phænomena explicentur. Ad Mechanices autem leges quod attinet, Virium atque Potentiarum proportionem, atque analogiam qua tandem ratione percipies Geometriæ ignarus? Totius sane Staticæ, & Hydrostaticæ leges, ex quibus universa ferme Physiologia pendet, ita Geometricis principiis innituntur, ut sine ipsis frustra ad eas animum adjicere cogites. Anatomia autem elementa nunquam mebercule vel intelliges, vel aliis rectè explicare poteris, si a Geometria refugies. Quomodo enim absque ulla verum Geometricarum cognitione demonstrabis cordis ventriculos esse aequales, nisi agnoveris eosdem esse inter se in ratione reciproca, ita ut quod uni deest ob mirorem amplitudinem sarciat velati major longitudo? Ea igitur est consensio (ut verbis utar Cl. Joan. Poleni in Oratione elegantissima, quam Putavii habuit de Mathesis utilitate), ea est consensio inter Mathematicam scientiam, & naturalem Philosophiam, ut vix possis de una cogitare, quin altera statim tibi obversetur. Et sane si historiam consulas, facile agnoscere poteris veteres omnes Philosophos, qui clarissimi habentur, Thaletem Mylesium, Pythagoram, Anaxagoram, Democritum, Platonem divinum prope virum, omnesque, qui ex Platonis Academia Philosophi exstiter, Geometriæ ita vehementer incubuisse, ut sine eadem sibi sapientis nomen vindicare ausi non fuerint. Itaque Xenocrates ei, qui Geometriæ rudis atque expertus

*pers infum alire cupiebat: Abi, intruit, anlis enim  
& adminiculis Philosophiæ cares. Hinc Academia for-  
ribus celata hæc legebatur inscriptio: ἰδὲ ἀγνοῦντες  
τοῦ αἰσίου, i. e. Nullus Geometriæ expertus accedito.*

*Ad Theologiam tandem quod attinet, dici sa-  
tis nequit quantum adjumenti Geometrica disciplina  
ad Sacras Literas rectè perdiscendas, atque explican-  
das conferant. Videfis pereruditum Libellum, quem Co-  
rolus Rabby conscripsit, & Guidoni Grandio dicavit  
de Mathematicarum Disciplinarum ad Theologiam uti-  
litate, ipsarumque in ea usu, & Opusculum Thomæpii  
Maphæi de usu Matheſeos in Theologicis, quod habe-  
mus in Tom. 2. Collectionis Calogerianæ pag. 355. &  
librum Joannis Craigii Prin. Mathem. Theol. Christ.  
Lond. 1699. Sed pluribus rem nobis exponit magnus  
Ecclesiæ Doctor Augustinus, qui cum ex Sacris Literis  
edoctus optime esset Deum ad Arithmeticæ, Staticæ, ac  
Geometriæ Leges omnia condidisse, libro 2. cap. 16. de  
Doctrina Christiana docuit sine numerorum scientia, mul-  
ta non intelligi a multis, quæ translata, ac mysticè in-  
scripturis posita sunt. Hoc idem docet Hieronymus in  
Ezechielis Caput IV., afferens magnam inesse numeris  
vim ad multa mysteria in Scripturis intelligenda; quo  
pariter loco Geometriam magnam asserre Theologis uti-  
litatem tradit. Quod non ignorans Gregorius Nazian-  
zenus summis laudibus Divum Basilium Præceptorem  
suum ad cælum extollit, quod in Astrologia, Geometria,  
Numerorum cognitione, cæterisque scientiis Mathema-  
ticis non mediocriter fuerit versatus. Sed quorsum hæc  
omnis spectat oratio? Ut intelligas nimirum, Lector  
Optime, nos jure reprehendi non posse si in Metaphysi-  
cis etiam eidem illi viæ, quam præsertim præstantissi-  
morum omnis memoriæ hominum signatam, atque impres-  
sam*

*Sam vestigiis videmus, ipsi quoque nos toto pectore, omnique animi contentione committimus. Quæ cum ita sint nemo quoque jure reprehendere poterit Geometricam methodum, quam modo in demonstranda Dei ejusque attributorum existentia secuti sumus. In hoc autem quantum profecerimus & Tu, & alii judicabunt. Tibi quidem, si consequar, ut studiorum nostrorum ratio & diligentia probentur, ego me, quæ summa sunt, omnia consecutum putabo. Vale.*



# DE DEI EXISTENTIA

## PROLEGOMENA.

### I. De discrimine quod intercedit Revelatam inter & Naturalem Theosophiam.



Theosophia nihil aliud est, quam scientia Dei, divinarumque rerum, & eorum omnium, quæ ad Deum pertinent. Eam tribui in Naturalem & Revelatam nemo est qui ignorat. Hæc principiis revelatis, illa naturæ ideis, & Phænomenis innixa de Deo, divinisque rebus differit. At quamquam jamdudum de Naturali Theologia tractationem Metaphysici, de Revelata vero Theologi sibi ita vindicarunt, ut provincias inter se partiti sint, attamen utrumque hoc Theologiæ genus excollendum est ei, qui omnibus numeris absolutus Theologus esse cupiat, ut nimirum idem, & quæ ratione duce comperta fieri solent, & quæ docet Revelatio, in promptu habeat. Magnus Ecclesiæ Doctor Augustinus utrumque sequi se solitum scribit. *Ego, inquit lib. 3. contra Accademicos cap. 20., ita sum affectus, ut quid sit verum, non credendo solum, sed etiam intelligendo apprehendere impatienter desiderem.* Rationem humanam *particulam* veluti quamdam esse *æternæ Dei rationis*, & *radium intellectus Dei* scribunt sæpenumero Justinus Martyr, Origenes, Clemens Alexandrinus, La-

stantius, aliique. Sed non leve est inter Naturalem, & revelatam Theologiam discrimen. Angustior & imperfectior illa est, hæc amplior & perfectior. Scilicet lumen naturæ exiguum admodum est, & magna ex parte ignorantia, & appetitionum tenebris obstitum, lumen vero revelatum & longius latiusque patet, & purius est atque sincerius. Hinc Apostolus ad Corinthios scribit: *Loquimur sapientiam Dei in Mystero, quam præcivit Deus ante sæcula ad gloriam nostram, quam nemo Principum hujus sæculi agnovit.* Et quamquam ipse Paulus in Epistola ad Romanos fatetur ope naturalis rationis Philosophos Deum agnovisse, nihil aliud tamen intelligit nisi existentiam, & prima quædam ac præcipua supremæ ac præstantissimæ alicujus causæ attributa. Itaque addit *eos in cogitationibus suis evanuisse*, nec coluisse ut Deum, quia nempe & in plerisque dubii fuerint & confusi, & notionem illam divinitatis vel erroribus turpissime fœdaverint, vel aliis factarum rerum imaginibus corruperint. Multa ex veterum Philosophorum Libris, multa ex Poetarum sententiis, si per tempus liceret, commemorare possem, quibus ea confirmentur, quæ dubia nemini debent esse. Id sane animadvertant velim ii, qui rationem naturalem in Adæ filiis stultè admodum supra Revelationem extollunt. Quod quid est aliud, quam, dum rationem tuearis humanam, cum ratione ipsa bellare? Recta enim ratio suadet hominem, postquam felicitatem sibi ipsi invidisse novimus, eundemque a beatissimo, in quo primum a Deo locatus fuerat, domicilio, fuisse jure dejectum, sine communicatione divinæ sapientiæ nec actiones ad æternæ rationis normam dirigere posse, nec ea amplecti, quibus constitutum sibi a supremo Conditoris finem consequatur. Quamobrem ea, quæ ad Deum præsertim spectant, ab

iis,

iis, qui *a Deo sunt orti*, perdiscenda sunt, quemadmodum loquitur Plato in Timæo. Præclarum est quoque illud Euripidis in Helena: *Neque compertum habeo quid certum sit in rebus humanis; Deorum verba esse vera reperi*. Ipsi ergo Gentiles Philosophi humanæ mentis imbecillitatem ad unum omnes agnoverunt, quorum testimonia congescit Auctor Opusculi Gallicè editi *de Imbecillitate Mentis Humana*.

Sed inde præterea Theologiæ naturalis imperfectio dignoscitur, quod nemo Philosophorum fuerit, qui, dum solam naturæ rationem sectaretur, non aliqua turbaverit circa naturam Dei & spirituum, originem Mundi, & providentiam, officia erga Deum & homines. Materiem omnes ferme Græci Philosophi, ne Platone quidem excepto, æternam esse putarunt; omnem providentiam, fortassis etiam divinitatem omnem, tum omnia divina & humana jura pedibus subjecere Democritici & Epicurei. *Panteïsmum* docuerunt Pythagorici; *Fatum* Stoici agnoverunt. Itaque jure veteres Ecclesiæ Patres, in primis Epiphanius, conqueruntur complures hæreses ex Philosophia, seu potius Philosophiæ abusu in religionem profectas esse. Neque vero veteres solum, Philosophi, sed ex recentioribus quoque complures in hujusmodi incidere possunt reprehensionem. Profecto ex nimia Cartesii admiratione maximi in Christiana Republica errores exorti sunt, inde enim exitit *Spinozismus*, quod a doctis viris observatum satis est. Ex renovato *Epicureismo* Physico emerfit *Hobbefianismus*, atque ex Chymistarum secta *Phanatismus*; & sunt, qui tradunt ex Newtonianis doctrinis *Panteïsmum* renatum esse. Quod diximus non ut Theologus hæc ignoret, quæ ei hac præsertim ætate sunt necessaria, sed ut ne in cujusquam verba juret, neque a ratione,

ultra quam par est se abripi sinat.

Illud quoque accedit maximum discrimen, quod Theologia naturalis neque perfectam doctrinam nobis exhibet, qua mores nostros componere possimus, neque ea suppeditat, quibus cum Deo, a quo Genus humanum per Protoparentis peccatum descendit, in gratiam redeamus. Hinc Apollolus *ad Cor. 1. cap. 1.* hæc habet: *Scriptum est, perdam sapientiam sapientum, & prudentiam prudentum reprobabo.* Id exemplo omnium fermè Philosophorum, qui Ethnici vocantur, comperitum satis fieri arbitramur. Quum enim solam naturæ rationem, velut optimam pietatis & sanctitatis ducem sectarentur, nihil in eorum libris, nihil in eorum vitæ ratione, & morum disciplina reperimus, quod non summam impietatem, atque superstitionem redolet. Quis unquam eloquentius de sanctitate, & pietate adversus Deum scripsit Epicuro (*Cic. de Nat. Deor. lib. 1.*)? At dum Deos ab hominibus colendos dicit, Deum sic feriatum vult cessatione torpere, ut, si se commoverit, timendum sit ne beatus esse possit. Atque ita dum Deos nihil curare, nihil agere docet, omnem funditus evertit Religionem. Quæ enim pietas ei debetur, a quo nihil acceperis? Quæ potest esse sanctitas, si Dii humana non curant? Egregiè ac sæpenumero hac de re disputant Patres. Unius Lactantii verba afferemus, quæ elegantissima sunt: *Doctrinam Dei*, inquit *Lib. VII., sequimur, qui scire solus potest, & revelare secreta, cujus doctrina Philosophi expertes existimaverunt naturam rerum conjecturâ posse comprehendere, quod nequaquam fieri potest, quia mens hominis tenebroso corporis domicilio circumseptâ longè a Dei perfectione submota est. Unde nobis aliquo lumine opus est ad depellendas tenebras, quibus offusa est hominis cogitatio. Lumen*



autem mentis humanæ Deus est, quem qui cognoverit, & in pectus admiserit, illuminato corde mysterium veritatis agnoscet, remoto autem Deo, cælestique doctrina, omnia erroribus plena sunt. Quod autem a Lactantio dicitur de humanæ mentis erroribus, idem dictum esto de voluntatis inconstantia & perturbatione. Locus est egregius Leonis Magni de *Vocat. Gent. Lib. 1. cap. 6.* Hæc, inquit, voluntas vaga, incerta, infirma ad efficiendum, facilis ad audendum, in cupiditatibus cæca, onoribus tumida, curis anxia, suspicionibus inquieta, gloriæ quam virtutum avidior, famæ quam conscientia diligentior, & per omnem sui experientiam miserior fruendo bis quæ concupierit, quam carendo, nihil in suis habet viribus, nisi periculi facilitatem; quoniam voluntas mutabilis, quæ non ab incommutabili voluntate regitur, tanto citius propinquat iniquitati, quanto acrius intenditur actioni. Hæc Leo. Ceterum non ita hæc dicta velim, quasi aut is, qui in Theologiæ studium se se abdere cupiat, omnem prius rationem excutere debeat, & nullus naturalis rationis sit in Theologia usus, aut nihil omnino de Deo, rebusque divinis ex Philosophia veluti excerpere possimus. Alioquin & stupidi tantum & Philosophiæ rudes homines Theologi summi esse possent, neque sane esset cur nos de supremi Entis existentia disputationem susciperemus. Imo oportet ut in hac quæstione rationem velut optimam ducem sequamur, si non omnino improspere cum Atheis bellandum sit, qui argumenta ex scripturis deprompta irrident, atque contemnunt. Itaque cogitandum est principia quidem rationis naturalis suos habere terminos, quos qui prætergrediatur, totum rectæ rationis usum pervertat, eadem tamen esse prima Dei, divinarumque rerum intelligendarum quasi se-

mi-

mina, & cum, qui iisdem intemperanter minimè abutatur, plurimum in Dei scientia proficere posse, iisque armis pugnare, quæ in angustum admodum locum Atheos adducant. *Principiorum naturaliter notorum*, inquit D. Thomas, *cognitio nobis divinitus est indita, cum Deus ipse sit Auctor naturæ nostræ, eaque principia divinâ sapientiâ contineantur.*

## II. De Atheismi causis.

Quamquam supremi atque infiniti Entis opinio omnium pulsât animos, nullusque etsi perditus plane & amens potest cognatum numen ex animo divellere, attamen sunt, qui non modo putant de Dei existentia dubitandum esse, sed invitum & repugnantem animum in errorem omnium maximum rapere nituntur, & Deum non esse temerè quidem sed facile pronunciant. Audiamus impudentissimi Athei verba apud Q. Sæctanum Satyr. 1. lib. 1.

*Maxima pars hominum pallet formidine Divæ,  
Dum templa & sacras jaculantur fulmine turres;  
Nec pudet ante aras, delubraque surda pacisci  
Mille animam votis, tuti velut otia cæli  
Sollicitent casus, nostræque pericula vitæ.  
Hos ego non tantum pecudes ratione carentes  
Expungo sapientum albo, quos vana coerces  
Religio, cæcæque superstitionis laborant.  
Num sanus ille fuit, Jovi qui fervida primus  
Tela dedit, flammamque sacram, nostrisque minacem  
Frontibus imposuit dextram, mentemque severam  
Quælibet humani scrutantem crimina cordis?  
Haud equidem credo; sed rerum inscitia torst  
Principio mortale genus, gelidoque medullas*

Ter-

*Terrare implevit. Nostra est dementia cælum,  
 Nostraque de cælo fecit formida Tonitrem.  
 Scilicet aut nullus Deus est, aut immemor usque  
 Quidquid agant homines, tutusque idemque beatus  
 Ambrosiæ latices, & longa oblivio potat,  
 Nec nostro aut fleu, nostrisque doloribus unquam  
 Flebitur.*

Si autem ex nobis fsciteris cur inter homines, eos quoque, qui in Christiana Republica nati, atque alti sunt scelesti quidam reperiantur, qui rerum omnium Creatorem & Dominum minime agnoscere velint, vel certe risu excipiant sanctissima Religionis dogmata, & jura omnia divina atque humana pedibus subjiciant, facile respondebimus tantæ miseræ causam petendam, esse ex crassiori quadam ignorantia, cujus remedia ne pati quidem possunt. Equidem experiundo satis novimus complures ita vivere, ut pecudum more nihil altum unquam suspiciant, & rationis lumine rectè uti nesciant, cujus sane adjumento principiorum, quæ clara sunt atque facilia, cognitionem sibi comparare nullo negotio possent. Nimirum toto vitæ tempore otio miferrimi languent, & animum ita hebescere sinunt, ut inter eos & bruta nullum ferme discrimen tandem agnoscas. Atheismi quoque pestis manat & fluit ex corrupta morum disciplina. Eos scilicet haud ægre, invenies qui voluptatibus ita indulgent ut omnibus, quæ ad potiundum incitant, per summam intemperantiam, frui velint, atque in iis beatitatem collocent. Itaque extinctum in hoc pestilentissimo hominum genere rationis lumen facile dixeris, eorumque vicem dolere satis non poteris. Mirum igitur esse non debet, si nullo veritatis inquirendæ studio teneantur, & ipsas naturæ leges susque deque habeant, ac inordinatis animi af-

fe-

fectibus parere quodammodo cogantur. Sed inter Atheorum gregem complures sunt, qui optimis, si diis placeat, rationibus innixi sibi suadent argumenta, quibus Dei existentiam probant Philosophi, imbecilla esse, si cum iis compares, quæ Deum nullum esse commonstrare videntur. Si eosdem audias, res est extra dubitationem posita; ajunt enim in hujusmodi quæstione definienda se plurimum temporis & laboris consumpsisse, & præjudicatis solutos opinionibus judicium tandem tulisse. Inter hos principem locum obtinent, ut ego quidem opinor, Spinoza & Hobbesius, cum quibus congregi conati sumus. Hæ sunt præcipuæ Atheismi causæ. Qui plura in hanc rem desiderat, consulat *Art. Atheisme Encyclop. Tom. 1. pagg. 777. edit. Ligurn.*, ubi sic de Spinoza loquitur Cl. Auctor: *Parmi les modernes, il n'y a d'Atheisme systematique, que celui de Spinoza.*

### III. De Hobbesio.

**M**alesburia, quod est Angliæ Oppidum, lucem adspexit Hobbesius anno 1588. Inter alios libros, quos in vulgus protulit, celeberrimus is est, quem primùm *de Cive* conscripsit, in quo multa alia peccans magno verborum apparatu demonstrare nititur Hominem ad bellum naturâ ferri, & ratione tantummodo moveri, ut pacem deinde pactorum ope & societatis exoptet, & quærat. Tam absurdum systema probatum fuit Gassendo in primis (*Vid. Budd. bist. philos. pag. 512.*), & Puffendorpio (*Vid. Praef. in lib. de Jur. Nat. & Gent.*). Imo Velthuysenius quidam, cum nonnulli animadverterent ab Hobbesio id tolli, quod maxime proprium esset optimæ præstantissimæque natu-

tz, librum *de Cive* ab omni vel minimo errore conatus est liberare, edità Apologià (*de Princip. Just. & Decor. e. c.*), qua nihil sane imbecillius. At non defuerunt clarissimi viri, qui invictè admodum demonstrarunt istiusmodi belli mutui suspicionibus ipsam naturam reclamare. In his primas tenent Cumberlandus (*Disquis. Philos. de Legib. Natur.*), Sharrockius (*De Offic. secund. Jus Natur.*), & Coquius (*Anatom. Hobbesian.*). Edidit & alterum librum Hobbesius, cui titulus *Leviathan*, illumque eo fine conscripsit, quemadmodum nonnulli arbitrantur, ut effrænem Angli populi furorem, suis veluti coloribus exprimeret. Cum enim Ipse a partibus Caroli Regis esset, totus in eo erat, ut Democraticum, & Monarchicum regimen everteret. Itaque hoc in libro docet nullam sine imperio pacem esse posse, nec imperium sine armis, nec arma sine Principe. In libro autem *de Cive* (*Cap. XII. XIV. XVII.*) jam statuerat a Principis voluntate rationes boni & mali pendere, ipsamque Religionem, ita sane ut hæc absque Regis assensu devincire animos nequeat. Singulas Hobbesii Propositiones, seu potius errores omnium maximos enumerat Bruckerus (*Histor. Critic. Philos. Vol. 5. pag. 182.*). Tandem, in eo libro, quem *de Libertate*, & *de Necessitate* Hobbesius scripsit adversus Bramhallum, tradit nihil esse omnino animum, & nomen libertatis totum inane esse. Quamobrem merito ipsum in Pantheistarum, & Atheorum ordinem adlegerunt Blentejus (*De Stult. & Irrat. Atheis. pag. 52.*), & Parkerus (*De Deo disput. 1. pag. 95.*); præsertim cum ipse Hobbesius (*Leviath. cap. 29. & de Civ. cap. 12. §. 1.*) clarissimis verbis docuerit, admissa Dei existentia, omnia confestim vincula societatis dissolvi, & de humanis legibus, & de Principum incolumitate actum planè esse. Sed, ut fieri solet, ipsum de

d

Atheis-

Atheismo purgare conati sunt Arnoldus (*Histor. Hæres. & Eccles. P. 2. lib. 16. cap. 17.*), & Judlingius (*Observ. select. Vol. 1. observ. 2.*). Scilicet nulla est tam absurda doctrina, quod suum non habeat Patrum. Qui plura de Hobbesio desiderat, Blackburnium (*Vit. Hobbesii an. 1681. Carolopolis*) consulat, & Wodiam (*Histor. Oxoniens. Univers. Lib. 2.*).

#### IV. De Spinoza.

**J**udæis ex parentibus nascitur Spinoza Amstelodami anno 1681. Dum adhuc esset in vivis, edidit *Traſſatum Theologico-Politicum*, in quo revelationem abiecit, Deumque cum Mundo turpiter confudit. Post illius mortem prodire *Ethica & Politica*. Dicitur fati nequit in quot ipse errores sit lapsus, vir ceteroquin ingenio præstans, & cum summis Philosophis facile comparandus. Sed vaferrimus Hebræus omnia in ejus operibus Geometrico quodam apparatu ita disposuit, ut nihil fortassis sit amplius, quod in hac re desiderare possis. Hinc Nostri rectè statuunt Spinozam Atheos omnes & Pantheistas tum veteres tum recentiores astutia & impietate vicisse. Celeberrimum est illius systema de Substantia unica (*Eth. Par. 1. Prop. 5.*), & æterna (*Ibid. Prop. 6.*), cui inesse bina docuit attributa, extensionem nimirum & cogitationem (*Eth. Par. 2. Prop. 1. & 11.*). Scilicet tradit res omnes illorum attributorum modificationes esse ita sane, ut corpora modi sint extensionis infinitæ, spiritus vero infinitæ cogitationis (*Ibid. Par. I. Cor. Prop. 5.*). Substantiam hanc unicam, quam Deum esse dixit (*Ib. Prop. IV.*), araneæ comparavit, quæ telam attextat. Res enim omnes, quæ nos circumstant, fila quædam esse sibi suavit ex Dei veluti visceribus texta atque elaborata.

Uc

Ut autem facilius tam absurdo systemate deciperet incautos, novas quasdam de Substantia, de Attributis, & de Modis Definitiones attulit, quæ a veritate nimium, quantum aberrant. Definitio Substantiæ a Spinoza allata hujusmodi est: *Per substantiam* (Part. 1. Prop. 7.) *intelligo id, quod in se est, & per se concipitur*. Definitio vero attributi: *Id quod intellectus de substantia percipit tanquam ejus naturam constituens*. Miramur autem tantum ingenium in tam leves, ne dicam in tam ineptas sententias incidisse. Sed nonnulli putant viam, qua Spinoza ad Polytheismum pervenit, eadem a Cartesio demonstratam fuisse. Cartesius (Part. 1. Principior. art. 51.) tria hæc statuerat: I. Illud esse verissimum, quod in idea clara continetur. II. Unicam tantum esse posse substantiam. III. Res omnes viribus ad efficiendum aptis ita carere, ut omnis motus a Deo tantummodo sit. Jam vero, si quosdam audias, ex prima, Cartesii lego, effici putavit Spinoza nullam esse Creationem, quia clara & evidens idea suadet ex nihilo nihil omnino fieri. Secunda lex hominem Atheum docuit nullum esse discrimen materiam inter & Deum; non intellecta enim creatione, & admissa materiei æternitate, illud sua sponte fluebat, ne duplex existeret substantia, Deum esse materiam. Ex tertio denique Cartesii placito didicit Hebraeus Philosophus corpora divinæ extensionis modos esse, & humanas animas modos divinæ cogitationis. A motis namque viribus effectricibus, ipsisque Deo tantum tributis, consequens erat divinæ substantiæ partes a partibus aliis fieri non posse, sed omnes ex necessaria quadam congenitaque Dei facultate a semetipsis esse. En originem perditissimi Spinozismi. Hinc Joannes Regius librum edidit, qui inscribitur: *Cartesius versus Spinozismi Architectus*. Verum, quamquam minime

negamus Cartesium, dum adhuc viveret, de Atheismo expositulatum fuisse cum a Martino Schuokio, tum potissimum a Gisberto Voetio, arbitramur tamen Spinozam, Cartesianis sententiis, & principiis intemperanter absum fuisse. Principio, qui tradunt ideam claram esse verissimam, nunquam ad id se adigi sentient, ut fateantur nullam esse creationem. Nulla enim clara & evidenti idea edocemur omnia ex re aliqua fieri: imo Deo vires non deesse, quibus e nihilo educat spiritum & materiam, clare agnoscimus. Deinde etsi materia ab æterno extitisset, non sequitur tamen eandem cum Deo confundi posse, quamvis substantiam unicam admisserit Cartesius. Ipse etenim nomine substantiæ rem communstravit, quæ alia non indiget ad existendum; cumque hoc pacto Deus solus existeret, hinc unicam tantummodo esse substantiam docuit. Ceterum, quum substantia nihil sit aliud, quam res, quæ accidentibus, seu proprietatibus constat, & subsistat in semetipsa, innumeras ferme substantias agnovisset. Cumque revera hujusmodi substantias agnovisset Cartesius, quarum aliis cogitationem, extensionem aliis tribuit, vehementer erravit Spinoza, qui Deum materiâ ineptè miscuit, & omnia turbavit. Tandem falsum omnino est, ut patet, causis secundis vires ad efficiendum deesse. Sed fingamus, si libet, verum esse Cartesii principium, non videmus tamen quomodo ex eo sequi possit omnia esse Dei modos. Si enim in Spinozæ sententia a semetipsis sunt modi, ergo a Deo ipso vim omnem effectricem abesse fateatur necesse est. Nihil de compositione dicimus, nihil de vicissitudinibus, quibus obnoxius esset Deus, si Spinozæ dogmata veritati consentanea essent. Absurda omnia, quæ ex hoc tam impio systemate manant ac fluunt, enumerat Baylius (*Dict. Crit. art. Spinoza litt. N.*) prolixè, & eleganter.



ter. Quamquam autem res ita se habet, cogitandum tamen non est impium Spinozæ systema ab eodem adinventum fuisse. Animadvertunt enim Eruditi illud multo ante Spinozam pluribus & Philosophis & Nationibus probatum fuisse. Mundanam quamdam animam per Universum diffusam Pythagoram, Platonem, & Socratem, agnovisse testantur Tullius (*lib. 1. de Nat. Deor.*), Plutarchus (*De Plac. cap. 3.*), & Lactantius (*Inst. lib. 1. cap. 5.*). Idem Tullius (*eod. lib.*) tradit Chrysippum docuisse vim divinam in ratione esse positam, & universæ naturæ animo atque mente; ipsumque Mundum esse Deum; Democritum vero in ea fuisse opinione, ut putaret imagines divinitate præditas inesse universitati rerum; tum principia, mentesque, quæ sunt in eodem universo, Deos esse. Hinc Virgilius

*Spiritus intus alit, totaque infusa per artus*

*Mens agitat molem, & magno se corpore miscet.*

Aristoteles etiam, ut animadvertit Thomasius, putavit omnia Deum condidisse *naturali quodam necessitate*; atque idcirco Aristotelem Spinozæ prævisse pluribus demonstrat Walchius in Dissertatione *de Atheismo Aristotelis*. Quid de Deo, ejusque libertate senserint Stoici, paucis complexus est Buddeus in Epitome *Histor. Phil. cap. 4. §. 38.* Arbitrabantur nimirum Stoici I. *Mundum hunc componi ex materia & anima Mundi.* II. *Cuncta facto regi, cui ipse Deus sit obnoxius.* Nomine autem fati intelligebant rerum omnium immobilem & immutabilem ordinem, aut vicissitudinem necessariam Mundi creati & increati. Non injuria igitur & Jacobus Thomasius (*in Dissert. de Exustione Mundi Stoica*), & Joannes Franciscus Buddeus (*de Atheismo & Superstit.*) censent Spinozismum in hac Stoicorum doctrina contineri. Idem Buddeus, & Hieronymus Gudlingius, & Petrus Baylius

(in

( in *Dict. art. Xenoph.* ) inter Spinozistas referunt Eleatenſes Philoſophos , quorum erat dogma , *unum eſſe omnia , idque eſſe ens infinitum , ſcilicet Deum*. Inter Philoſophos tandem , qui Deum affirmarunt eſſe materiam , formas vero rerum accidentia , recenset Albertus ( *In I. Phyi. traſt.* 3. *cap.* 13. ) Alexandrum Epicuræum . Alexandro adjungi ſolet David de Dinant , & Almericus ejus præceptor , de quo hæc Gerson ( *Traſt. de Concord. Metaph. cum Logic.* part. 4. ) retulit : *Omnia ſunt Deus ; Creator & creatura idem. Idem creat & creatur . Deus ideo dicitur ſuiſ omnium quod omnia reverſura ſunt in ipſum , ut in Deo immutabiliter conquieſcant , & unum individuum atque incommutabile permanebunt*. Almerici errores refellit Divus Thomas in libro *Cont. Gent.* pag. 17. Abelardus tandem , & Jordanus Brunus ſubſtantiam primam , ſeu materiam univerſi primam , Deam eſſe dixerunt . Inter nationes , quæ in ea fuerunt hæreſi , in qua fuit deinde Spinoza , Petrus a Valle ( *Itiner.* vol. 3. pag. 394. ) Mohammedanos memorat , qui putabant omnia , quæ continentur in hac rerum univerſitate , Deo non diſerre . His Pendetioſ Bernerius addit ( *Contin. Monum. de Imper. Mogoliſt.* pag. 202. ) . Neque igitur rei novitate exultare poteſt Spinoza . Sed de Spinoziſmo ante Spinozam videſis Diſſertationem Buddei , quam ſuperius laudavimus . Prætereundi denique non ſunt qui Spinozæ vitam ſcripſerunt , & errores confutarunt . Inter eos , qui Spinozæ vitam & reſ geſtas literis mandarunt , primas tenent Collerus ( *Vit. Spinoſ.* ) , Reimannus ( *Hiſtor. Theolog. Judæor.* lib. 2. *Cap.* 18. ) , Schudtius ( *Memorabil. Judaic.* par. 1. lib. 4. ) , Baſnagius ( *Hiſtor. Judæor.* par. 9. *cap.* 37. ) , Jacquelotius ( *Vit. Spinoſ.* ) , & Jenichius ( *Hiſtor. Spinoziſmi* ) . Inter eos vero qui enixe operam in Spi-

noza confutando impenderunt, celebriores sunt Blyen-  
burgius (*Verit. Relig. Christ.*), & Bredenbourgus  
(*Enerv. tract. Theolog. Polis. anno 1675.*), & com-  
plures alii, quorum nomina collegit Baylius (*Dict.  
Crit. art. Spinoza.*). His statutis, longa de nostra di-  
sputatione detracta oratio est. Et quoniam, ut monet  
Tullius, omnis quæstio a definitione suscipi debet, ut,  
quid sit illud, de quo disputatur, explanetur, nonnul-  
las hic attulimus definitiones, quæ hujusmodi sunt.



*Opinionum commenta delet dies , natura  
judicia confirmat .*

**Cic. de Nat. Deor. lib. 1.**

*Philosophia viro prodest plurimum , si Religione  
imbutus sit animus .*

**Lactan. Lib. IV. cap. 1.**

## DEFINITIONES.

- I. **N**omine *entis* intelligimus id, quod *existere* potest, seu cujus *existentia* non repugnat.
- II. *Ens necessarium* illud est, cujus *existentia* est absolute necessaria, seu, quod idem est, quod rationem *existentiæ suæ* sufficientem in *essentia sua* habet.
- III. *Essentia* definiri potest id, quod primum de ente concipitur, & in quo continetur ratio sufficiens cur cætera vel actu insint, vel inesse possint.
- IV. *Necessarium* dicitur id, cujus oppositum impossibile est, seu contradictionem involvit.
- V. *Contingens* est, cujus oppositum nullam contradictionem involvit, seu quod necessarium non est.
- VI. Dei nomine intelligimus *Ens a se*, ens nimirum quod existit necessitate naturæ, & in quo continetur ratio sufficiens *existentiæ Mundi* hujus adspectabilis.
- VII. Ex nihilo oriri dicitur aliquid, dum ita *existere* incipit, ut nihil ejus antea extiterit.

## AXIOMATA.

- I. **P**er se *existere*, & se ipsum *producere*, contradictorium est.
- II. Quod absolute necessarium est, *contingens* esse nequit.
- III. Quod necessariam habet *existentiam*, immutabile est.
- IV. Id quod contingens est, obnoxium est mutationibus.

A

V. In-

- 2
- V. Infinita series contingentium sine ente necessario, a quo pendeant, repugnat.
  - VI. Nihilo nihil tribui potest; caret modis, & proprietatibus.
  - VII. Ex nihilo nihil potest existere.
  - VIII. Posito effectu necessario intelligitur causa, etsi eadem lateat.
  - IX. Causa effectui semper præexistit.
  - X. Aliquod ens modo existit.
  - XI. Id quod dicitur de natura *Totius*, idem dici debet & de natura partium.

## POSTULATA.

- I. **A**liquod ens modo existit, quod semper minime extiterit.
- II. Nihil est sine ratione sufficiente cur potius sit, quam non sit.
- III. Si existentie ratio sufficiens in essentia entis continetur, ens necessario existit, atque existentia ejus absolute necessaria est.

## MONITA.

- I. **A**xiomatis vocabulo non intelligimus solum prima illa principia, quæ per se se ita clara & certa sunt, ut demonstratione non egeant, sed intelligimus quoque eas omnes Propositiones, quarum certitudo in hebetiores etiam oculos statim incurrit, quæque ita pariter evidentes sunt, ut de iis nulla dubitatio suboriri possit. Infinitæ autem sunt ferme Propositiones, quæ etiam inter prima prin-

3

principia minime recenseantur à Philosophis, eam  
tamen evidentiam & certitudinem obtinent, quam  
obtinent principia, quæ vulgo dicuntur *prima*. Vi-  
desis *Encyclop. T. 1. art. Axiome*.

- II. Videat primùm benevolus Lector quò spectet Defi-  
nitio VII., quam posuimus, antequam dijudicet ip-  
sam pugnare cum Axiomate VII.
- III. Postulatum III. diversum admodum est ab Axiomate  
*Nihil est sine causa*. Etenim fatentur quidem  
omnes nihil sine causa esse posse, sed non omnes  
concedunt *nihil esse sine ratione sufficiente*. Pe-  
timus igitur ab ingenuo Philosopho, ut id sit in  
concessis.
- IV. Inter veteres & recentiores Philosophos, qui ar-  
gumentis ex ratione depromtis Dei existentiam de-  
monstrarunt, nemo melius, sapientissimorum homi-  
num iudicio, id præstitit SAMIELE CLARKIO,  
qui, ut testatur Ricotierius (*Avertiss. du Traduct.*  
*Pag. XIV.*), *a mis à quartier sous les argumens*  
*populaires, dont on se sert ordinairement pour*  
*prouver cette grande verité, & s'est fait un loi*  
*de ne rien avancer qu'il ne prouvât démonstrati-*  
*vement*. Itaque CLARKIO potissimum duce & au-  
ctore & nos demonstrabimus Dei ejusque attribu-  
torum existentiam, & iis quidem argumentis, qui-  
bus ipse usus est in Tractatu *De l'Existence &*  
*des attributs de Dieu*, quæque, si quid sentimus,  
repugnantem etiam Atheorum animum in assensum  
rapere possunt. Id in ipso hujus Libelli exordio  
ingenue & libentissimè fatemur. Et quamvis in  
hujusmodi disputatione opinionem sequi nullam  
possis, quin tibi sit confestim vel cum Spinoza,  
vel cum Hobbesio contendendum, quoniam ta-  
men, bene captis auspiciis, negotium expedien-  
dum

7  
dum nobis sumptimus, non modo terreri nos rei  
magnitudine & gravitate patimur, sed potius læti  
& incredibili veri videndi studio elati, ipsi no-  
bis stimulos addimus, nec valdè reputamus ea,  
quæ nobis in portum properantibus molesta admo-  
dum occurrere, & moram injicere possent.



CA-





## C A P U T I.

Propositio I. *Aliquod Ens ab æterno existit.*

*Demonstratio.*



Liquod ens ita modo existit, ut  
semper minime extiterit (*Post.*  
I.), vel certè aliquod ens modo  
existit (*Ax. X.*); oportet ergo  
ut ens aliquod ab æterno fuerit;  
si enim ab æterno ens aliquod minimè fuit, co-  
gitandum erit aliquod ens ex iis, quæ modo  
existunt, ita e nihilo emerfisse, ut nullam exi-  
stentiæ causfam agnoscere debeat. Atqui id om-  
nino repugnat (*Ax. VII.*); etenim qui sibi  
fingit ens e nihilo eductum, ita ut existentiae  
caussa nulla sit, is sibi fingit ens productum  
simul & improductum. Id autem absurdum  
pla-

plane est; ergo ens aliquod ab æterno extitit. Et revera ita ens quodlibet existere intelligimus, ut ipsius existentiae causa, & ratio cur potius existat, quam non existat aliqua esse debeat (*Post. II.*); nam vel existit ex intrinseca quadam necessitate, & entis naturæ veluti cognata, vel ex voluntate alterius entis. Si primum, jam habemus, quod petimus (*Ax. III.*); erit namque æternum illud ens. Si alterum, cum causa effectui semper præexistat, fatearis oportet illud ens, ex quo alterius existentia profecta est, enti creato præexistisse (*Ax. IX.*). Patet igitur extitisse ens aliquod ab æterno. Si quis vero a nobis petat qua nam ratione ab æterno extiterit illud ens, id est quod nos nescire ingenue fatemur. Neque enim hic quæstio instituitur de modo, quo ens illud existat, se de ejusdem ab æterno existentia. Quamobrem cum demonstratum sit ens aliquod ab æterno extitisse, moveri minime debemus argumentis, quæ adversus ejusdem æternitatem afferri solent. Etenim etsi clare non intelligam quomodo ens illud existat, idem tamen ab æterno existere certè scio.

LIBER II. DE CAUSIS ET EFFECTIBUS. CAP. I. DE CAUSIS.

CA-

## CAPUT II.

Prop. II. *Independens & immutabile ens ab aeterno exiit.*

**D.** **S**I ens aliquod ab aeterno existentiam habuit, ut in superiori Propositione demonstratum est; ergo vel oportet ut illud sempiternum ens immutabile sit, & independens ita sane, ut omnia quæ sunt, quæque fuerunt ab eodem originem ducant; vel necesse est, ut intelligatur congeries veluti quædam infinita entium, quæ mutationi obnoxia sint, & alia ex aliis nexa ita ut unius productio causam agnoscat in altero, & nullum commune sit eorumdem existentia principium; sed postrema hæc hypothesis in absurda compellit (*Ax. V.*), quæ vel ipsi Athei declinare debent. Si enim huiusmodi seriem infinitam entium in ea hypothesi intelligas, quorum unum ex altero pendeat, alterum ex altero, & ita porro, perspicuum sit universam deinde eorumdem entium congeriem nullam agnoscere existentia causam extrinsecam, nam omnia quæ existunt, quæque extiterunt, huiusmodi congerie continentur. Compertum quoque est nullam com-

mon.

monstrari posse causam intrinsecam existentiae totius seriei, nam in hac infinita serie nullum est ens, cujus existentia ex alterius existentia non fluat, ac proficiscatur, & nullum in eadem est ens, quod a se & necessario existat. Si ergo omnes & singulae partes, ex quibus entium congeries existit, necessario non existunt, obscurum profecto nemini esse potest *Totius* existentiam necessariam non esse (*Ax. XI.*): necessitas namque absoluta non in re aliqua extrinseca, relativa, & contingenti, sed in essentiali entis proprietate (*Def. IV.*), quod necessario existit, locari debet. Atqui absque contradictione intelligere non possumus congeriem entium, quorum existentiae nulla fuerit causa intrinseca, vel extrinseca (*Ax. VII. & VIII.*); nimirum entium multitudinem, quae divisim sumpta existentiae causam agnoscunt, & conjunctim deinde nullam existentiae causam habent (*Ax. XI.*). Ergo si ens aliquod ab aeterno extitit, oportet, ut illud sempiternum ens immutabile sit & independens. Quod si fingere sibi non potest Atheus, quin in absurda impingat, modo entium congeriem ita existere, ut eorum existentiae causa intrinseca & extrinseca nulla sit (*Ax. VII. & VIII.*), profecto omnia simul entia ab aeterno, iidem

9

dem suppositis, extitisse, absurdum quoque  
deprehenditur; tempus enim contradictionem  
hypothesis neque gignit si existentia entium  
tempori jungatur, neque eandem tollit si  
tempora minime intelligas. Velint igitur no-  
lint, fateri debent Athei ens immutabile &  
independens semper extitisse.

### C A P U T III.

Prop. III. *Ens sempiternum, immutabile &  
independens nullam habet existentiae causam ex-  
trinsecam, scilicet per se se & necessario existit.*

**D.** **I**D omne quod existit vel ita existit,  
ut e nihilo emerferit per se se,  
vel ita existit ut existentiae causam extrin-  
secam agnoscat, vel tandem ita existit, ut  
existentiae causa sit intrinseca, nimirum du-  
catur ex necessitate quadam absoluta (Def.  
IV.), quae fluit ex essentialibus entis proprie-  
tatibus. Atqui in I. Prop. demonstratum est  
nullum ens emergere potuisse e nihilo, quin  
causam productionis habuerit; in III. vero  
ostendimus omnia entia, nullo excepto, caus-  
sam extrinsecam productionis habere non pos-  
se, sed necessario existere ens sempiternum  
atque independens: Reliquum est ergo, ut

B

in-

intelligamus ens illud sempiternum, atque independens nullam habere existentiae causam extrinsecam, scilicet per se se & necessarium existere.

*Schol. I.* Animadvertas hic tamen velim: improprie tantummodo, & lato quodam sensu causae nomen tribui *necessitati*, quae sempiternum & independens ens existit. Nam si huiusmodi vocabulo eam subiectam esse notionem intelligas, ut nimirum ens illud se ipsum produxisse agnoscas, constantia verba te minime profari vel rudis quisque dijudicaverit (*Ax. I.*). Igitur ens sempiternum & independens existit necessitate absoluta, quae necessarium adhærescit ad ipsam naturam rei, quae existit. Cæterum necessitas, de qua loquimur, & si prior minime sit existentiae entis *prioritate temporis*, ut ajunt, est tamen prior *prioritate naturæ*, nimirum idea necessitatis existentiae se se nobis exhibet, quam alia idea existentiae entis, quod sempiternum est & independens. Cogitandum igitur non est huiusmodi necessitatem ex entis necessarii existentia manare, ita scilicet ut prius entis existentia concipi debeat, deinde vero ipsa necessitas; nam si rem ita se habere tibi suaseris, perspicuum sane fiet necessitatem hanc absolutam non esse, neque ea in-

ni-

niti existentiam rei (*Def. II.*). Et revera idea entis necessario existentis nobis vel invitis occurrit, & nullo unquam conatu efficere possumus; ut ea a nobis veluti abscedat. Itaque quamvis mihi fingere velim nullum esse ens, cujus sempiterna sit & necessaria existentia; attamen idea *infinitatis*, atque *æternitatis* se se mihi objiciunt, ut eadem me excutere non posse sentiam (*Prop. I.*): scilicet sine contradictione concipere, non possum nullum esse ens in hac rerum omnium universitate, ad quod hæc attributa necessario adhærescant. Norunt enim omnes attributa & modos sine existentia substantiæ, cui jungantur, nullam plane existentiam habere. Igitur si quis æternitatem, immensitatem, adeoque substantiam illam, ex cujus existentia proficiscatur horum existentia attributorum, nullam esse supponat, is profecto relationem æqualitatis inter 4. & productum  $2 \times 2$  negare poterit. Nam si naturam rerum & communes ideas consulamus, facile dignoscemus contradictoria proferre, qui vel immensitatem neget, vel eidem æternitatem minimè tribuat. *Moveantur partes Spatii de locis suis, & movebuntur, ut ita dicam, de se ipsis*, inquit *Newtonus lib. 1: jehol. ad Def. 8.* Quare sublatam & non sublatam in-

ea hypothési partem spatii cogitandum esset, nimirum sublatam, quia supponis motam esse de loco suo, minimè deinde sublatam, quia adhuc remanet locus ipsius partis, scilicet ipsum spatium. Quo quid absurdius?

*Schol. II.* Hujusmodi argumentum ejusque vim maximam satis percipient Philosophi, qui spatium nihil non esse optime agnoscunt. Quamquam autem Cartesiani arbitrantur spatium immensum, *purum & merum nihilum*, habendum esse, facile tamen ostendere possumus notionem hanc indignam plane esse Philosopho, qui rectam rationem tanquam optimam ducem sequi velit. Nam nihilo nihil tribui potest; caret modis & proprietatibus (*Ax. VI.*), neque de eo verè affirmari aliquid potest, de quo omnia verè negantur. At ita minime se habet immensitas, sive spatium, quemadmodum satis patet.

*Corol.* Ex his ergo habes ideam entis, quod necessario & a se existit, nihil aliud esse, quam ideam entis, cujus existentiam in dubium revocare nequit is, qui absurda & contradictiones declinare velit (*Def. IV.*). Quoniam enim intelligimus absolutè necessarium esse, ut ens existat, cujus existentiae necessitas essentialis sit, & ex ipsius natura ducatur, evidens est necessitatem hanc ita absolutam

tam



tam esse, ut ex nulla pendeat hypothesi (*Ax. III.*). Quid namque se se tandem exhibere poterit, quod prius sit in ente, quod a se existat? Nihil tale, si verum fateri velimus, nobis unquam fingere possumus. Necessitas ergo, quæ minime *relativa* intelligitur, quæque absolute essentialis & naturalis est, nunquam abesse potest ab ente, cujus existentiam necessariam vocamus; & si quis eam negat, in absurda & contradictiones incidet (*Def. IV.*). Relatio æqualitatis e. g. inter 4. & productum  $2 \times 2$  ita absolute necessaria est, ut in nulla unquam hypothesi eandem sublatam fingere sibi quis potest, si sibi constare velit.

#### C A P U T    I V.

Prop. IV. *Ens, quod a se existit, necessario sempiternum esse debet.*

D. **I** Dea æternitatis, & idea existentia, quæ a nullo pendeat, ea inter se cognitione continentur, ut intellecta æternitate entis, cujus existentia causa nulla sit, intelligatur existentia ejusdem, quæ necessaria absolute esse debet; & intellecta necessitate entis a se existentis, intelligatur quoque il-

illud esse necessariò sempiternum: Atqui in superiori *Propositione* demonstravimus ens a se existens ita necessariò existere, ut necessitas sit absoluta, atque ex natura fluat; ergo intelligimus ens, quod a se existit, necessario sempiternum esse. Et revera cum necessitas, de qua est sermo, ea sit, ut a nulla extrinseca pendeat causa, perspicuum sane sit mutationi nunquam obnoxiam eandem esse posse (*Ax. III.*); nam hujusmodi mutatio proficisci deberet ex actione causæ extrinsecæ, quod in nostra hypothese penitus repugnat. Patet itaque ens naturæ necessitate existens ita esse sempiternum, ut initium existentiae nullum sit, finis ejusdem nullus esse possit.

*Schol.* Animadvertendum hic tamen est infinitum intercedere discrimen inter modum, quo Deus existit ab æterno, & modum, quo existunt omnes aliæ substantiæ, eæ quoque quas non manet interitus. Etenim hujusmodi substantiæ, quia angustis admodum concluduntur limitibus, nequeunt unico intuitu cernere præterita, perfectè cognoscere præsentia, & tanquam ex alta specula prospicere futura. Earumdem cognitiones, viresque suos habent fines, quos ne prætergrediantur cautum est. E contra ens sempiternum, & prima omnium rerum causa cognitione perfectiss.

Etissima & immutabili cuncta complectitur, in ejus æterna *duratione* minimè occurrunt momenta temporum, clare intuetur præterita, præsentia, & futura sine ulla idearum successione, ejusdemque imperio omnia ita subjiciuntur, ut illud perpetuo persentiscant. Hæc æterna entis infiniti *duratio*, si pressè loqui velimus, nihil aliud tandem est, quam *interminabilis vita tota simul*, & *perfecta possessio*, ut loquitur Boetius de *Cons. Phil. lib. v. prop. 6.*

## C A P U T V.

Prop. V. *Ens, quod a se existit, necessario infinitum est, & omnipræsentiam habet.*

D. **S**I ens ita existit, ut causam intrinsecam existentia habeat ex natura fluentem ( *Schol. I. ad Prop. III.* ), oportet ut illud idem ens sit infinitum; atqui demonstratum est ens ita a se existere, ut necessitas existentia absoluta sit, & ex ejus natura manet ac fluat ( *Prop. III.* ); ergo infinitum quoque esse debet ens, quod a se necessariò existit. Et sane ens, quod ita a se existit, ut necessitas existentia sit absoluta, nullam in eo vel temporis, vel loci, vel alterius cujuslibet rei relationem intelligere possumus ( *Def. IV. & Ax. III.* ).

Si

Si res ita se habet, ens illud ergo infinitum esse debet. Atque ut res explendescat, sibiingat Atheus, si libet, ens finitum, quod a se existat: jam non poterit tempus ullum intelligere, quo ens illud non existat, alioquin in contradictionem incidet (*Prop. IV.*). Quoniam vero ex hypothese ens illud finitum est, profecto relationes temporis, loci, & causarum, quæ extrinsecæ sint, in eodem agnosceret, adeoque existentiam ab eo avertere, fas erit. Itaque supponere ens finitum a se existens ita absurdum est, ut nihil supra.

Jam vero si absque ulla contradictione ens aliquod abesse a loco A intelligere possum, nihil impedit sane quominus mihi fingam illud idem ens abesse a loco B. C. D. &c., uno verbo a quolibet loco, nimirum ens amplius non existere; ergo perspicuum est ens illud ita extitisse, ut causam extrinsecam existentiae habuerit. Sed quum causa extrinseca locum non habeat in existentia entis, quod necessario a se existit (*Prop. III.*), patet equidem omnipræsentiam denegari eisdem non posse.

*Corol. I.* Quamobrem *infinitas* entis a se existentis est perfectissima, quemadmodum & immensitas: scilicet fines, quibus concluditur, nulli sunt, minimè subjicitur mutatio-

tioni, neque modo major, modo minor intelligi potest. Limites, si placet, a materia avertamus; infinita tamen eadem ita non erit, ut perfecta infinitas habenda sit, quæ ipsi tribuitur; nam in ea adhuc falsa hypothesis vacuum, quod vocant *diffeminatum* intelligere potero. At ens a se existens necessario præsens esse debet æque omnibus locis, idem necessario esse debet ubique. Verè ergo & absolute infinitum atque immensum est ens, quod a se existit.

*Coroll. II.* Ex his quoque sequitur ens, quod a se existit, divisioni obnoxium non esse, partibus non constare, minime moveri, nullam habere figuram, uno verbo esse ens, cui proprietates, quæ ad materiam pertinent, minime adhærescunt. Hujusmodi enim proprietates evidenter & necessario nobis commonstrant finitum aliquod ens, & cum *infinitate*, quæ perfecta sit, consociari nequeunt.

## CAPUT VI.

Prop. VI. *Ens a se existens necessariò unicum esse debet.*

D. **V**eritas hujus Propositionis facile explendescere potest. Unitas supremi entis fuit ex necessitate existentiae ejusdem. Nam necessitas absoluta simplex est, neque varietas ulla in ea intelligi potest, alioquin ex extrinseca causa penderet, quod absurdum plane est (*Prop. III.*). Porro sibi nunquam fingere poterit. Atheus duo vel plura entia, quæ diversa sint, quæque independentes & necessariò a se existant, quin in contradictionem incidat, quod ita demonstro. Singula hujusmodi entia ex hypothese ita existunt, ut eorum existentia necessaria & independens sit; ergo intelligere possumus eorum unum ita existere, ut alia minime existant, adeoque necessitatem existentiae in iis nullam amplius esse agnoscamus. Quod enim ita existit, ut ejus existentia independens omnino sit, sibi ipsi ita sufficere debet, ut hypothesis, cujus ope intelligo nihil aliud præter ipsum existere, sit hypothesis possibilis, & a qualibet contradictione libera, quemad-

admodum attendenti satis patet. Ergo vel eorum entium unum ita existet, ut alia minime existant, vel nullum existet necessarium. Ens ergo, quod a se existit, unicum esse debet, atque id omne, quod ab ejus essentia diversum est, necessarium existere nequit.

Et revera existentia entis, quod necessarium sit, ante intelligi debet, quam cujuslibet alterius entis existentia intelligatur, ita sane ut fingere nequeam aliquid existere, quod minime supponat ens a se & necessario existens. Ex. cau. quemadmodum hypothesis existentiae alicujus rei in hypothesis existentiae spatii & temporis necessarium continetur; nam si absque spatio & tempore aliquid existere posset, ita profecto res existeret, ut nullibi, & nullo tempore ea foret, & spatium & tempus necessarium minime existerent, quae absurda plane deprehenduntur: Ita quoque hypothesis entis, quae non includat necessarium hypothesis praexistentiae alterius rei, evidenter ostendit hujusmodi alterius rei existentiam necessariam non esse. Itaque fieri non potest, ut ideam existentiae alicujus rei, & ipsius existentiae ideam obtineas, nisi idea entis necessarium existentis prius gignatur.

Coroll. I. Unitas ergo entis, quod a se existit, optime confociatur cum iis, quae

de dogmate Unitatis Dei in Sacris Litteris traduntur.

*Coroll. II.* Nihil eorum Philosophorum opinione absurdius excogitari potest, qui bina agnoscunt diversa principia, Deum scilicet, & materiam, quæ a se & independentes existant.

*Coroll. III.* Ex his tandem sequitur & risu & cachinnis dignam plane esse opinionem Spinozæ, qui cum & ipse agnoscat absolute necessarium esse, ut ens a se existens unicum esse debeat, concludit deinde Universum hoc, & omnia, quæ in eodem continentur, substantiam unicam esse, æternam, increatam, & necessariam (a). Oh lepidum caput! Imo statuere debebat omnia, quæ nos circumstant, nec æterna, nec necessaria esse, nec esse posse. Etenim quoniam res omnes, quas conspiciamus, diversæ omnino sunt inter se; quoniam in iis nullum vel exiguum necessitatis vestigium intuemur, cum sint omnes

---

(a) Una substantia non potest produci ab alia. Spin. Ethic. Par. V. Prop. VI. Ad naturam substantiæ pertinet existere. Id. Prop. VII. Præter Deum nulla dari, neque concipi potest substantia. Id. Prop. XIV.



nes infinitis pene mutationibus obnoxia; quoniam ipsæ dissimilibus præditæ sunt proprietatibus, quæ dissimilibus finibus respondent; quoniam tandem inter se ita distinguuntur, ut clare agnoscere possimus unam non esse aliam (a), modos & essentialia attributa unius non pertinere ad modos & ad essentialia attributa alterius, vel rudis quisque statuere poterat nihil esse in hac rerum Universitate, quod necessario existeret, adeoque omnia ab externa causa, nimirum ab ente supremo & a se existente pendere. Sed tam turpis Spinozæ error ex obscura quadam & falsa substantiæ definitione, quam ipse attulit, tanquam ex fonte proficiscitur. Ejus definitio his concipitur verbis: *Per substantiam intelligo id, quod in se est, & per se concipitur, cujus conceptus non indiget conceptu alterius rei, a quo formari debeat . . . Ad naturam substantiæ pertinet existere; hoc est, ipsius essentia involvit necessario existentiam* (b). Jam vero vel hæc sub-

---

(a) Consulas hic velim Libellum, cui titulus: *Trattato dell' unità delle cose* c. c., & de quo mentio facta est in Ephemeridibus Litterariis Panormitanis Num. 16. 1772. Col. 250.

(b) *Spin. Eth. Part. V. Prop. VII.*

substantiæ definitio minime se se sustinet, & in hac hypothefi de ejus systemate, quod huic definitioni innititur, actum plane erit: vel si aliquid exprimit, & ab omni errore immunis est, fequitur neque materiam, neque animum, neque ens quodlibet finitum, verè & proprie in Spinozæ fententia fubftantiã dici poffe. Hoc ergo fubftantiæ vocabulum, aptari poterit tantummodo enti, quod a fe exiftit. Si res ita fe habet, quomodo fuadere nobis deinde poterit nullam in Univerfo effe libertatem, & potentiam, atque ens quodlibet abfolutã neceffitate ita exiftere, ut nullo aliõ modo exiftere poffit (a)? Et fi igitur nobis probetur illa fubftantiæ definitio, ni-

- 
- (a) *Res nullo alio modo, neque alio ordine a Deo produci potuerunt, quàm produéta funt.* Spin. Eth. Par. I. Prop. XXXIII. Sed Spinozæ fententiam ita explicat Vir Cl. Samuel Clarkius: *Ainfi l'opinion de Spinoza, exprimée en termes clairs & fûivis, revient évidemment a ceci; c'eft, que tout le Monde materiel & chacune de fes parties, auffi bien que leur ordre & leur maniere d'exifter, que tout cela, dis-je, eft l'unique Etre, qui exifte neceffairement & par lui-même. De l'exiftence, & des attributs de Dieu, Prop. 3. pag. 52.*

nihil tamen proficit Spinoza, dum concludit omnia necessario & absolute existere. Etenim, cum juxta eandem definitionem neque materia, neque humanus animus, neque quodlibet aliud finitum ens sit, & esse possit substantia, sed solum substantiæ modus, quoniam via & ratione Ipse tandem probabit modos quoque a se existere, cum a se existat substantia? Respondebit fortassis: *Ex necessitate divinæ naturæ infinita infinitis modis (hoc est omnia quæ sub intellectum infinitum cadere possunt) sequi debent (a)*. Sed hoc est sibi fingere causam infinitam & a se existentem, quæ liberrime non agat, sed turpi quodam fato, & absoluta necessitate veluti rapiatur, quod absurdum omnino esse inferius demonstrabimus.

CA-

---

(a) *Ibid. Prop. XVI.*

## CAPUT VII.

Prop. VII. *Ens a se existens esse debet ens intelligens.*

D. **H**Ujus propositionis veritatem agnoscere valde recusant Athei. Ens a se existere atque hujusmodi ens æternum esse, infinitum, principium, fontem & originem rerum omnium ægre quidem, sed tamen miserrimum illud hominum genus argumentorum vi ductum fatetur. At inter Atheos, qui vel arbitrentur Mundum ab æterno extitisse tum quo ad formam, tum quo ad materiem, vel putent materiem tantummodo necessariam esse, nullum reperies qui sibi suadere velit ens a se existens esse intelligens, quique non defendat tutum idemque beatum otium intra cœli spatia, scilicet ens esse, quod fato quodam ducatur, & necessariò omnino agat quidquid agit, si tamen actio tribuenda ei sit. Equidem fatendum est directè, & *a priori*, ut ajunt, demonstrari non posse ens a se existens qualibet necessitate, carere, dum agit, idemque esse ens intelligens, atque, ut Scholasticorum utamur vocabulo, *realiter activum*. Etenim ignoramus ferme

me naturam attributi, quod intelligentiam  
vocamus, neque fas est intueri conexi-  
onem immediatam & necessariam, quæ intercedit  
inter existentiam entis a se existentis, &  
inter ejusdem intelligendi vim. Verum a po-  
steriori demonstrationem si petas, nihil est  
quod facilius expedire possimus: omnia nam-  
que, ex quibus armonica hæc Mundi ma-  
china existit, clamant quodammodo primam  
causam eam esse, ut infinite sapiens, infi-  
nite intelligens sit (a). Quoniam enim aliæ  
atque alii perfectionis & pulchritudinis gra-  
dus distingui facile possunt in hujus Universi  
partibus, & naturalis rerum ordo fert, ut  
caussa excellentior nobiliorque effectibus, quos  
gignit, intelligi debeat, profecto obscurum  
esse nequit in ente a se existente, ex quo  
om-

---

(a) Inter recentiores Philosophos, qui hac ratione su-  
premi ens intelligens esse sapienter demonstrarunt,  
principem locum obtinent Boyle (*Traité de Causes  
finales*), Ruy (*de la Sageſſe de Dieu, dans les Ouvra-  
ges de la Creation*), Derham (*de l'Existence & des  
Attributs de Dieu par les Ouvrages de la Creation*),  
Nieuwentitius (*de l'Existen. de Dieu*), Lesserus (*Theo-  
log. des insectes*), Fabricius (*Theolog. de l'Eau*), Cud-  
worthus, Jaquelotius, Eduardus, Parkerus, alique.

omnia profecta sunt, contineri atque explendescere excellentissima quadam ratione perfectiones, quibus contingentes substantiæ impertiuntur. Quod si fingat Atheus in effectu esse perfectionem, quæ in ejus causa non contineatur, statuatur quoque oportet eam perfectionem esse simul productam & improductam, quod est absurdum (*Ax. VIII.*). Atqui constat inter perfectiones entium, quæ contingentia vocantur, recensendam esse eam, quam *intelligentiam* nominamus, seu intelligendi vim: ergo oportet, ut ens a se existens, fons & origo omnium, sit necessariè intelligens. Equidem, si quid sentio, summam hujus argumenti vim plurimum persentiscere debent Athei, eandemque declinare nunquam poterunt nisi forte dixerint nullum esse in hoc Universo ens, quod intelligendi vim obtineat, vel hujusmodi intelligendi vim non esse perfectionem a materia distinctam, sed existere ex quadam veluti mixtione figurarum, & motuum. At, ut primum effugium Atheistis eripias, provoces velim insipiens hominum genus ad intimum sensum. Nullum inter eos etiam, qui arbitrati sunt bruta esse materialia quædam automata nihilque aliud præterea, reperire poteris, cui vel similis de hominibus opinio injecta  
fue-

fuerit. Quod autem secundo loco afferunt, ita absurdum est, ut nihil aliud absurdius excogitari possit (a). Quoniam enim certissime hominibus inest facultas, quam intelligendi & cogitandi vim, perceptionem, cognitionemque appellamus, oportet sane ut eadem vel ex traduce, vel ex ipso sinu materiæ, quæ cognitionis & intellektionis expers sit, vel tandem ex potentia supremæ & intelligentis substantiæ profecta sit; si primum, ergo necesse est ut intelligamus infinitam qualitatum earundem congeriem, cujus nulla erit causa, quamvis in hac congerie aliæ ex aliis dependant, & nullius existentia necessaria sit; constat autem ex II. Propositione id absurdum esse; igitur prima Atheorum hypothesis omnino evertitur. Si alterum, cum cognitio, seu intelligendi vis sit perfectio a materia distincta, neque ex combinatione figurarum & motuum existere possit (b); ergo

en-

(a) Sed finge etiam, si placet, intelligendi vim non esse perfectionem a materia distinctam, adhuc tamen intelligis ens a se existens esse necessario ens intelligens.

(b) Rem fufius probavimus in Dissertatione *De Immortalitate Animorum*, quam edidimus anno 1770. Sed aliam infistens viam, rem quoque probat Clarkius

entia, quibus inest hæc intelligendi vis, haurire eandem potuerunt ex materia, quæ hujus attributi expers est. Quis autem non videat desipere prorsus eos, qui hæc subspectantur (*Ax. VI.*)? Nam fieri certè nequit, ut perfectio in ens proficiscatur ab ente, quod neque *eminenter*, neque *actu*, ut dicitur, eandem obtineat. Id, ut arbitror, ita explendescit, ut clarissima lux hæc facile in omnium oculos incurrat; si enim res rei impertiri posset perfectionem, qua caret, jam perfectio e nihilo emergere potuisset sine causa (*Ax. VIII.*), quod absurdum esse nulus negaverit. Reliquum est igitur ut fateamur intelligendi vim ex potentia supremæ & in-

---

*de l'existence de Dieu Chap. IX. Prop. VIII. pag. 103.*

Nunc vero audiant Athei & aliud argumentum, cuius vim maximam ipse Baelius agnovit *Dict. Histor. art. Leucippe Remar. E.* Exploratum omnibus est, qui vel leviter sint Physicis institutionibus imbuti necessario materiem vel in motum, vel in quietem ita verti, ut de illo statu, quem mechanicæ & naturales leges expostulant, dejici nequeant. Sed animis ea inest potestas, ut velint & nolint, agant pro imperio & non agant, seligant, & quod seligerint, id rejicere lubentissime possint. Ergo cogitandi vis ope motionum corporum explicari nequit.



29

intelligentis substantiæ in homines profectam  
fuisse.

## CAPUT VIII.

Prop. VIII. *Ens a se existens est agens liberum.*

D. **S** Pinoza ejusque Sectatores pugnantissime defendunt ens a se existens esse ens necessarium, & libertate omnino carere; & hoc quidem principio nititur impiissimum Spinozæ systema. At ex probationibus Propositionis, quas modo afferremus, patere satis poterit cum ratione prorsus bellare Spinozistarum fœdissimum gregem. Itaque ex superiori Prop. facile hujus, quam posuimus, demonstrationem fluere arbitramur. Nam ens intelligens, quod libertatis expers sit, stricte & pressè loquendo vocari nequit ens intelligens. Finge detractam de ente libertatem; ergo & detractam de eodem potentiam agendi intelligis, adeoque esse non poterit ullius effectus causa, uno verbo erit ens, ut loquuntur, merè *passivum*. Necessario enim agere, si vera loqui volumus, est revera non agere. Quum igitur Spinoza ait ex necessitate divina natura

ra

*ra infinita infinitis modis sequi debere (a)*, imperitis quidem imponere fortassis poterit, qui verborum apparatu, & obscurioribus loquendi formulis faciliè decipi possunt, non vero iis, qui falsa, etsi pulchris involuta vocabulis, vel primo intuitu dignoscere valent. Et revera *natura divina necessitas* in Spinozæ sententiâ ea non est, ut infinitam divinæ naturæ perfectionem, infinitam æquitatem divinæ voluntatis, quæ omnia sapientissime, libere, & suaviter disponat, nobis exhibeat, sed necessitatem absolutam, & ex natura divinæ naturæ ita fluentem, ut fatum quoddam inexorabile sit, & omnia Deus necessario operetur. Quamobrem quum ajunt Spinozistæ Deum ex necessitate naturæ esse principium & causam omnium, quæ existunt, verba & verba prætereaque nihil nobis donant. Imo, si rem penitus inspicias, facili negotio deprehendes verbo quidem causæ nomen tribui Deo, sed re ipsa eidem denegari. Si quis dixerit saxum ex necessitate naturæ causam esse sui casus, profecto risu hæc exciperes; nam necque causa necque  
agens

---

(a) *Est. Par. I. Prop. XVI.*

agens est in ea hypothesi factum . Sed ad hanc delati sunt opinionem Spinozistæ , quia ipsi in ea sunt hæresi , ut putent omnia , quæ in adspectabili hoc mundo cernimus , a se existere , & materiam inter & Deum nullum plane discrimen intercedere , quod absurdum esse jam ostendimus . Simili modo dum Deum esse ens intelligens , & cognitione præditum fatentur , hujusmodi qualitates eidem tribuunt , quia cogitandi vim materiæ inesse arbitrantur .

Deinde si supremam & primam causam libertate destitutam intellexeris , ita ut ejus actiones necessariae sint , quemadmodum necessaria est ejus existentia , facile quoque dederis rem quamlibet , quæ modo non existit , nunquam existere potuisse ; omnia , quæ nunc existunt , non existere non posse ; tandem mutationi nulli ea , quæ existunt , obnoxia ullo unquam tempore fuisse , nec esse posse . Porro cum hæc omnia absurda prorsus dignoscantur , perspicuum est primarum entium omnium causam perfectam libertate præditam esse , & necessitatem nullam in ejus actionibus intelligi . Quamquam autem res ita se habet , attamen Spinoza minime veretur ea omnia facillime confiteri , & conceptis verbis ait eadem fluere ex principiis , quæ  
ada-

adamavit. *Alii putant, inquit ipse (a), Deum esse causam liberam, propterea quod potest, ut putant, ut ea, quæ ex ejus natura sequi diximus (hoc est quæ in ejus potestate sunt), non fiant. Sed hoc idem est ac si dicerent, quod Deus potest efficere, ut ex natura trianguli non sequatur ejus tres angulos æquales esse duobus rectis . . . . Ego me satis ostendisse puto a summa Dei potentia omnia necessario effluxisse, vel semper eadem necessitate sequi; eodem modo ex natura trianguli ab æterno & in æternum sequitur ejus tres angulos æquari duobus rectis. Et ad demonstrationem Prop. XXIX. hæc habet: Omnia ex necessitate divinæ naturæ determinata sunt, non tantum ad existendum, sed etiam ad certo modo existendum, & operandum, nullumque datur contingens. Et Propositione XXXV. ait: Quidquid concipimus in Dei potestate esse, id necessario est. In Corollario ad Prop. XXXII. docet Deum non operari ex voluntatis libertate. Tandem Propositione XXXIII. Res nullo alio ordine, inquit, neque alio modo a Deo produci potuerunt, quam productæ sunt. Audiamus modo optimas, si Diis pla-*

---

(a) *Eth. Part. I. Schol. ad Prop. XVI.*

placet, rationes, quas peracri ingenio vir præditus affert. Primo igitur Propositione XVI. ait ex necessitate divina natura infinita infinitis modis sequi debere. Deinde si res alterius naturæ, inquit Propositione XXXIII., potuissent esse, vel alio modo ad operandum determinari, ut naturæ ordo alius esset; ergo Dei alia etiam natura posset esse, quam jam est. Tandem Corol. ad Prop. XVII. ita loquitur: Adversarii qui negant ex necessitate divina naturæ omnia necessario fluere, Dei omnipotentiam negare videntur. Coguntur enim fateri Deum infinita creabilia intelligere, quæ tamen nunquam creare poterit. Nam aliàs, si scilicet omnia, quæ intelligit, crearet, suam, juxta ipsos, exhauriret omnipotentiam, & se imperfectum redderet. Ut igitur Deum perfecte statuunt, eo rediguntur ut simul statuere debeant, ipsum non posse omnia efficere, ad quæ ejus potentia se extendit.

Verum facilis est ad hæc responsio. Primum Spinozæ argumentum supponit id definitum, quod quæstioni subjicitur. Nam libentissimi quidem fatemur in natura infinitè perfecta intelligi potentiam, quæ infinita infinitis modis creare possit. At eandem substantiam fato quodam & necessitate absoluta & naturali ita duci, ut quidquid agit, neces-

E

sa-

sario semper agat, id sane est, quod argumento depromto ex naturalibus ipsius substantiæ perfectionibus, hominibus, qui rationem velut optimam ducem sequantur, persuadere nunquam poterit Spinoza. Nam si supponat ens infinite perfectum esse agens necessarium, ineptè principium petet, quod dialecticæ principiis vel leviter imbutus agnoscat.

Imbecillum quoque est alterum Spinozæ argumentum. Nam quomodo tandem probare Ipse poterit ex hypothesi, in qua facile intelligimus Deum aliis atque aliis temporibus pro imperio & infinita sapientia, quam omnes suspicimus, jubere posse ut hæc vel illa existant, aliam necessariò fluere hypothesim, quæ nobis commonstret voluntatem & naturam ipsius mutationi obnoxiam esse? Nunquam sane Adversarius, etsi callidus admodum, efficere id poterit. Sed armis iisdem, quibus nos petit, cur eundem conficere, fas non fuerit? Si Deus *necessitate naturæ infinita semper infinitis modis* producit, quemadmodum Spinoza fingit; ergo Dei natura infinitis necessariò mutationibus subjicietur. Videat veterator homo quid ad hæc respondere possit.

Postremum, quod assert, argumentum non

non risu modo, sed cachinnis dignissimum arbitramur. Etenim si methodum Spinoziticam sequi velis, facillimè Dei æternitatem destruere poteris eleganti & lepidò hoc argumento: *In finita divina substantia duratio exhausta actu nunquam intelligitur; ergo Deus sempiternum esse, ejusque durationem infinitam minime intelligere possumus.* Appage deliramenta. Vident sane omnes, qui clarissimè luci oculos occludere minimè velint, omnipotentiae notionem eam esse, ut agnoscere, debeamus nova semper Deum creare posse, nihil autem de omnipotentia detrahi, nihilque addi, vel Mundum condiderit, vel non. Ita etiam infinitae durationis natura ea esse debet, ut nunquam exhaustam eandem nobis fingere possimus: alioqui infinita simul foret & finita, quod repugnat. Quamquam vero argumenta, quæ nobis Spinoza proponit, non indigna prorsus essent Philosopho (quod tamen fateri valdè recusamus); obscurum tamen nemini esse poterit principium, quo ipsius nititur systema, nimirum *naturæ ordinem immutabilem* necessariò habendum, ita absurdum deprehendi, ut stomachum moveat. Contrarium enim illud est experientiae, naturæ rerum omnium, & ideis, quas omnes obtinent, & ex quibus philosophandum

dum est. Circumspiciamus, si libet, omnia, ex quibus Mundus constat. Equidem ubique reperire fas erit sive substantias, sive modos, quæ clarissima & valida nobis supeditare poterunt argumenta, quibus ostendamus omnia permanere ex causa, quæ perfectè libera sit. Necessitas enim nulla, quæ vera necessitas (a) nominari possit, se se nobis exhibet. Motus ipse, ejus quantitas, gravitationis leges pro imperio causæ liberæ definita sunt. Nihil admodum favet Spinozæ pulcherrimus quidem sed constans ordo, quo in cælorum spatiis sydera disposita novimus. Nam Planetarum numerus major vel minor, quam nunc est, & esse & intelligi potest. *Dum autem Cometa*, inquit Nevvtonus (b), *moventur in orbibus valdè*

ec-

(a) Necessitas, quæ dicitur *convenientiæ*, cujus etiam ope intelligunt nonnulli non alio modo potuisse mundum disponi, quin suam amitteret pulcritudinem, vera & absoluta necessitas appellari non potest, ut patet.

(b) *Opt. pag. 345.* Idem autem Newtonus *Princip. Lib. III. Prop. VIII.* ut magis ac magis Dei Libertatem, sapientiam, & potentiam extollat, ita loquitur: *Planetarum densitates ferè sunt, ut radices dia-*

me-



*eccentricis undique & quoquoque in omnes partes cæli, utique nullo modo fieri potuit, ut cæco fato tribuendum sit, quod Planeta in orbibus concentricis motu consimili ferantur omnes. Tam miram uniformitatem in Planetarum systemate, necessario fatendum est intelligentia & consilio fuisse effectam. Quid vero dixeris de Plantarum, atque animantium tanta & tam mira varietate? Næ plumbeus ille fuerit, qui ab his rapi se minimè senserit in admirationem sapientiæ & consilii Summi Opificis. Sed jam pudet (Augustini verba Ep. 56. usurpare libet) me ista refellere, cum eos non puduerit ista sentire. Cum vero ausi sint etiam defendere, non jam eorum, sed ipsius generis humani me pudet, cujus aures hac ferre potuerunt.*

CA-

*metrorum apparentium applicatæ ad diametros veras, hoc est, reciproce ut distantia planetarum a Sole, ducta in radices diametrorum apparentium. Collocavit igitur Deus Planetas in diversis distantis a Sole, ut quilibet pro gradu densitatis, calore Solis majore vel minore fruatur. Hinc concludit aquam nostram, si in orbita Saturni posita esset tellus, congelationi obnoxiam fore; abituram vero esse in vapores, si in Mercurii orbita statueretur. Hujus vero effectus causam, ducit ab ipsamet Solis luce, quæ in orbita Mercurii septuplo densior est, quam in orbita telluris.*

## CAPUT IX.

Prop. IX. *Ens a se existens, a quo omnia producta sunt, infinitam obtinet potentiam.*

D. **H**Æc Propositio vix probationem desiderat. Quoniam enim solus Deus a se existit, quoniam omnia, quæ Mundi machinam componunt, eidem referre debent acceptam, quam habent, existentiam, & quoniam tandem Creaturarum omnium potentia ita ab eodem profecta est, ut illius imperium persentiscant, nihilque ejus voluntati sese opponere possit; ergo oportet intelligamus in suprema omnium causa eam potentiam, qua nulla major excogitari queat, & facillime & perfectissime ipsum agere quidquid velit. In Sacris Literis iis, ut ita dicam, coloribus divinæ Potentiæ imaginem expressam admiramur, ut pulchrior alia desiderari nequeat (a). Sed nos non latet hujusmodi Scripturarum testimoniis nihil commoveri posse Atheos. Novimus enim contra  
 pes-

---

(a) *Job. cap. 9. & cap. 26. v. 6. Isai. cap. 40.*

pessimum hoc hominum genus argumenta ex  
 ratione deprompta esse tantummodo aptissima  
 arma, quibus dimicemus. Itaque principid  
 animadvertimus infinitam potentiam omnia  
 quidem possibilia complecti, minimè autem  
 manare ad ea, quæ contradictionem invol-  
 vunt. Ut res e. g. sit & non sit eodem tem-  
 pore, ut eadem extiterit, & non extiterit,  
 efficere nequit ens etsi infinitè potens. Nam  
 hæc potentia efficiendi, ut eodem tempore  
 res simul sit & non sit, nullo modo appella-  
 ri potest potentia; pura enim & mera *ne-*  
*gatio* tibi se se exhibet, ut patet. Deinde  
 compertum esse arbitramur eandem infini-  
 tam potentiam extendi non posse ad ea,  
 quæ naturalem imperfectionem in ente, cui  
 hujusmodi tribuitur potentia, commonstrare  
 valent. Ex. cau. nunquam dixeris ens infi-  
 nite potens se ipsum posse destruere, & per-  
 fectiones, quas obtinet, vel imminuere, vel  
 in nihilum redigere. Perspicuum est enim  
 hæc omnia longissimo & infinito abesse in-  
 tervallo ab ente, cujus existentiam necessa-  
 riam agnoscimus (*Def. IV. & Ax. III.*). Du-  
 bitationi obnoxias esse non posse hujusmodi  
 Propositiones faciliè arbitramur, adeoque  
 pluribus easdem explicare supervacaneum di-  
 judicamus. Demonstrandum potius poten-  
 tiam

tiam creandi materiem nullam aliam esse posse, quam potentiam infinitam, quod fateri valde recusarunt veteres, valde nostra hac ætate recusant Athei recentiores. Impossibile absolute est, inquiunt, ex infinita potentia entis a se existentis materiam fluxisse, ita ut e nihilo educta fuerit. At si ab ipsis petas, ut fontem commonstrent unde haurire liceat contradictionem, quam sibi fingunt, quæque sola veram & realem impossibilitatem gignit, hærebunt sane, nec aliquid asserere poterunt. Et revera *rem existere modo, quæ antea minime extiterit*, si quis pronunciet, quid quæro contradictionis videre poteris in Propositione, quæ certè confundi non debet cum hac alia: *Res simul est, & non est*. Infinitum inter eas discrimen, quod intercedit, in oculos confestim incurrit. In postrema enim contradictionem *directam*, ut ajunt, facile cernis, in alia vero nullam vel *directam*, vel *indirectam* contradictionem deprehendes. Fatemur equidem confundi facile posse ideam *creationis* cum idea *formationis* ab iis, qui præjudiciis ex sensu manantibus abrepti de re judicare velint; sensibilibus namque assueti oculos tantummodo conjiciunt in ea, quæ vel corruptione intereunt, vel generatione oriuntur, dum sermo instituitur de  
ni-

nihilo & creatione. Quamobrem sicuti rei formatio supponit materiam præexistentem, ita sibi facile suadent *nihilum* esse veluti præexistens aliquid, dum audiunt ex eo materiem eductam esse; atque ita repugnantem & invitum animum ad errorem rapiunt. Quis enim vehementer non doleat miserrimè ideas confundi? Quis non dederit istud hominum genus recte comparari posse cum puerulis, qui arbitrantur tenebras ens quoddam reale esse, quod ex appulsu solis ad horizontem destruat, vel certè commutetur in lucem? Itaque recta tantummodo existet in nobis Creationis idea, si intelligamus tributam existentiam rei, quæ antea nihilo æqualis erat (*Def. VII.*).

*Schol.* Memoria hic repetas velim celeberrimum illud argumentum ex Mathematicis disciplinis depromptum, quo Cl. Guido Grandius in Libro de *Quadratura Circuli* pag. 33. infinitam esse potentiam, quæ e nihilo rem educit, demonstrat. Illud nos attulimus in Dissertatione de *Immortalitate Animatorum*, quam edidimus anno 1770. pag. 77. not. 88.

## CAPUT X.

Prop. X. *Suprema rerum omnium Causa infinitam obrinet sapientiam.*

D. **H**Ujus Propositionis Demonstratio ex superioribus Propositionibus fluere videtur. Etenim evidens omnino est insitum ens, immensum, & infinite intelligens, infinita carere non posse sapientia, quæ in perfecta rerum omnium cognitione locatur. Ens, quod sempiternum est, quod a se existit, a quo omnia profecta sunt, cui referre debent acceptas perfectiones omnes entia, quæ hoc Universo continentur; ens, a quo perpetuo contingentes substantiæ ita pendent, ut ab ipso redigi in nihilum possint (*Schol. ad Prop. IX.*), non ne cognoscere perfecte debet, & unico intuitu cernere præterita, præsentia, futura, & possibilis? Non ne comperta habere debet ea, quæ magis conformia, & consentanea sunt bonitatis & sapientiæ legibus? Quoniam vero limites nullos agnoscit ejus potentia, quis tandem cum ejus voluntate bellare poterit, ejusdemque sapientissimis consiliis & decretis adversus resistere? Quod si res ita se habet, quis in divinis  
ope-

operibus infinitam sapientiam humiliter non veneretur? Verum, ut effugium nullum Atheis relinquatur, ita pressius rem demonstramus.

Ens supremum est infinitum (*Prop. V.*); ergo infinitis locis præsens esse debet; atqui nequit esse ubique per essentiam, quin etiam ubique sit per cognitionem, quæ ab ejus essentia avelli non potest; ergo quemadmodum ejus essentia infinita est, ita quoque ejusdem cognitio infinita intelligi debet. Porro si infinita ejus est cognitio, nihil profecto ejus oculos effugere poterit; omnia distincte, clare, & perfecte ubique intuebitur. Quemadmodum, quia immensitatem obtinet, omnia subit & penetrat, nullaque vel minima pars creatæ substantiæ intelligi potest, quæ in eo non sit, & veluti ab ipso non vinciat; ita etiam, quia ejusdem cognitio fines non agnoscit, omnia nuda atque aperta ejus oculis esse cogitandum est, adeout in rerum omnium naturam & essentiam cognitione sese veluti abdat, & hominum cogitationes, atque secreta cordium sine ullo labore scrutetur. Deinde non modo Deo sistitur quodlibet ens, verum etiam ejus imperio omnia subjiciuntur. Itaque si ea, quæ existunt, cognitione complectitur supremum ens, ad possibilia quoque se se extendere debet ejusdem cognitio.

Et quoniam Dēus solus a se existit, solus est causa omnium perfectionum, quibus multiplices & diversæ adspectabilis hujus Mundi substantiæ ornantur, patet Deum solum perfecte cognoscere extensionem ejus potentiæ, quam creaturis inesse voluit. Quum porro cernat ipse compositiones quaslibet seu concreciones, divisiones, mutationes, relationesque omnes, quæ inter creatas substantias sunt; quum agnoscat perfecte finem, ad quem singula entia naturâ feruntur, equidem extra dubitationem omnem positum est nullam aliam intelligendi & cognoscendi vim in supremo ente intelligi posse præter eam, quæ infinita sit, ita sane, ut quod melius sit, quod aptius sit in qualibet hypothese, quodque certissime conducere valeat ad eum, quem sibi proposuit finem, intueatur, & sine ullo erroris metu cognoscat. En paucis notionem, quæ, ut arbitramur, infinitæ sapientiæ vocabulo subiecta est. Quamobrem intellectâ in ente a se existente potentiâ infinitâ, oportet quoque, ut in eo infinitam sapientiam admiremur.

*Schol.* Ad demonstrandam infinitam entis supremi sapientiam minimè hic utimur argumento ducto ex perfectionibus hujus Mundi, ex Phœnomenis, ex mira rerum omnium varic-



rietate, ex pulchritudine, ex ordine, quarum rerum aspectus ipse satis indicat Deum aliquem esse. Id docte & eleganter omnes ferme veteres & recentiores Philosophi præstiterunt. *Cælestem ergo admirabilem ordinem, incredibilemque constantiam, ex qua conservatio & salus omnium omnis oritur, qui vacare mente putat, is ipse mentis expers habendus est. Verba sunt Tullii, quæ habes Lib. II. de Nat. Deorum.*

## C A P U T XI.

Prop. XI. *Ens, a quo omnia pendent, est necessario infinitè bonum, infinitè iustum, infinitè verax; & ut paucis rem complectamur, omnes obtinet perfectiones; quæ morales appellantur, quæque decent Supremum Factorem & Dominum omnium.*

D. I. **S**upremum ens ita existit, ut sibi ipsi omnino sufficiat (Prop. VI.), & infinitam, qua fruitur, beatitatem locatam agnoscat in perfectionibus infinitis, quibus carere nunquam potest; ergo intelligimus ab ipso ita conditum fuisse Mundum, ut essent entia, quæ particulam quamdam ex

haberent. Itaque pro varia substantiarum natura ens infinite sapiens alios atque alios perfectionis gradus creaturis tribuisse facile agnoscimus; adeoque in homine, qui libertate præditus est, magis explendescere divinas perfectiones, quam in substantiis, quæ & libertatis & cognitionis expertes sunt, dijudicamus. Et quoniam beatitatis desiderio ita homo tenetur, ut eo carere nunquam possit, quis unquam negabit ita eum esse a natura comparatum, ut, si rectè libertate utatur, & malefactis absteineat, beatitudinem tandem, quam vehementissime optat, in Deo ipso omnium perfectionum fonte reperire debeat? Sed ens supremum infinite bonum esse, nimirum immutabilem ad benefaciendum creaturis inclinationem, eamque perfectissimam, obtinere, facili negotio intelliget, qui sibi suaserit Deum ex necessitate suæ naturæ nullius prorsus creaturæ indigere; nam perspicuum sane sit malitiæ, odii, invidiæ; omniumque possibilium caussarum, ex quibus id, quod vocamus malum, proficisci solet, quæque, ut satis patet, oriuntur tantummodo ex indigentia, imbecillitate, & imperfectione, earum, inquam, rerum vel levem suspicionem locum nullum habere posse in ente supremo.

Quam-

Quamobrem immutabilem & perfectissimam; semper bonitatem in eo conservari quis unquam negaverit?

II. *Æquitatis regula*, ut omnes norunt, sita est in natura rerum, & in relationibus necessariis, quibus omnia colligantur. *Actualis* autem justitia, nimirum virtutis hujus actus aptari debent variis rerum naturis, variisque earundem proprietatibus. Atqui ens infinite sapiens, cujus oculos ea æquitatis regula effugere nequit, cujus judicia infallibilia sunt; ens, quod perfectissimè justitiæ naturam perspectam habet, quod potentiam infinitam exercendi justitiam obtinet, quod tandem neque fraus, neque dolus, neque timor, neque aliud quodlibet commovere possunt, atque huc illuc rapere, hujusmodi, inquam, ens necessario ita semper agit, ut ejus actiones cum justitia perfecte consentiant, neque iniquitas, præjudicia, & personarum acceptio easdem gignere, aut certe iis sese admiscere unquam valeant. Ergo clarum sit infinitam justitiam esse in ente, a quo omnia pendent.

III. Ens illud verax necessario est, a quo necessario absunt inconstantia, metus, oblivio, & ea, quæ vocatur judiciorum

*precipitatio* ; atqui ab ente , quod sibi plenissime sufficit ( *Prop. VI.* ), quod est infinitè sapiens ( *Prop. X.* ), infinitè bonum , infinitè justum , hæc omnia abesse necessario debent , ut satis constat ; ergo illud idem , infinite verax esse debet , nimirum fideliter omnia implere , quæ pollicetur , & datam fidem liberare , atque in iis , quæ revelat , a veritate nunquam declinare vel tantillum debet ,

IV. Quoniam vero suprema rerum omnium causa hujusmodi perfectiones ex necessitate naturæ manantes obtinet , obscurum profecto nemini esse poterit omnes alias perfectiones , quæ *Morales* vocantur , eadem contineri ; alioquin vel de infinita bonitate , vel de infinita justitia , vel de infinita veritate actum plane esset .

## C A P U T X I I .

*Prop. XII. Deus existit .*

D. **A** Liquod ens ab æterno existit ( *Prop. I.* ), illudque independentens & immutabile ab æterno existisse intelligitur ( *Prop. II.* ), ita sane ut nullam habuerit

rit existentiae causam extrinsecam (Prop. III.); idemque sempiternum esse (Prop. IV.), esse infinitum & omnipræsentiam habere (Prop. V.); esse debere unicum (Prop. VI.), intelligendi vim (Prop. VII.), & libertatem (Prop. VIII.), & infinitam potentiam obtinere (Prop. IX.), infinitam obtinere sapientiam (Prop. X.), esse necessario bonum, justum, verax, & omnibus præditum esse perfectionibus, quæ decent supremum conditorem & dominum omnium constat (Prop. XI.); Ergo existit Deus (Def. VI.). Jure itaque optimo post hæc ita loquitur Clarkius (a): *C'est donc en vain que les ennemis de Dieu & de la Religion se glorifient d'avoir la Raison de leur côté. Cette Raison qu'ils prouvent tant, & dont ils se vantent de suivre de point en point le lumieres, n'est point pour eux.*

Videant quid ad hæc respondere possint Hobbesius & Spinoza. Itaque & refellere eos, & refelli sine iracundia parati sumus. Audiamus ergo præcipua argumenta, quæ adversus Dei existentiam ab Atheis afferri solent; nam pleraque alia, quæ Cudvorthus

(Syl.).

(*Syst. Intell. sect. 1. cap. 17. §. 101. & seqq.*)  
 protulit vix digna anicularum lucubratione  
 habentur. Ut autem commodius disputatio  
 explicetur, nonnullas selegimus Propositiones,  
 quæ hujusmodi sunt. Utinam tam facile vera  
 invenire possemus, quam falsa convincere.



PRO.

# PROPOSITIONES SELECTÆ

## *Quas Disputationi subijcimus.*

I. **E**NS a se existens necessario intelligens est, liberum, & omnipresentiam habet.

II. Optime in Deo consociantur immutabilitas, & libertas; & mala omnia, quibus undique premimur, minime pugnant cum ejusdem bonitate, sapientia, omnipotentia.

III. Argumentum, quo in *Prop. VI.* demonstrat CLARKIUS Ens a se existens necessario esse debere, unicum, mirifice se se sustinere arbitramur. Itaque minime movemur iis, quæ adversus illud argumentum, Atheorum nomine, assert Cl. Anonymus in Epistolis ad Clarkium datis anno 1713., quæ habes ad calcem, *Tom. I. de l'Existence & des Attributs de Dieu, des devoirs de la Religion Naturelle.*

IV. Complures in ea sunt hæresi, ut putent Supremi Numinis existentiam demonstrari posse ope tantummodo implorata ex Naturæ Phænomenis. At quoniam ii, qui pro Atheismo pugnarunt, Dei ejusque attributorum existentiam iis argumentis evertere conati sunt, quibus ægerrime obsistere possis nisi *a Priori*, ut vocant, arguas, profecto dignam commendatione arbitramur methodum, quam secuti sumus in demonstranda Dei existentia. Equidem Dei Æternitas, Immenfitas, Unitas, quæ principium est totius Naturalis Religionis, demonstrari nequeunt, nisi argumentum petas ex natura causæ, quæ a se & necessario existat.

---

---

*Disputabuntur publice in Aula Palatii Archie-  
piscopalis Mont. Regal. Anno MDCCLXXII.  
Mense Jun. Die*

**F I N I S.**

VA1

1544720